



安徽通志

ル 5
1575
76



1575
76

重修安徽通志卷二百三十

人物志

武功一

安徽風氣果毅代有奇才異能之士決戰於疆場衛社稷而執干戈功烈炳然歷載史冊

聖朝簡用人才折衝禦侮自將帥專閫而下凡有勞績紀於太常舊志載於武功其序如此邇者我

穆宗毅皇帝福祚中興肅清東南中原底定滇黔關隴以次蕩平皖南北之名將勁旅立功徧於天下詳具

國史方略散見各州縣志其中多現存之人例不立傳其有戰功著名而臨陣捐軀及受傷遽隕者悉載忠節傳中以表大節不
僅書勳而已述人物志武功傳

重修安徽通志

卷二百三十

人物志

武功

一

安慶府



安慶府

唐張鎮周舒州望江人初從隋陳稜討流求為先鋒斬其小王歡斯老模又擊走其王渴刺兜追斬之以功為金紫光祿大夫入唐為舒州總管武德六年大破輔公祏於黃沙鎮八年遷都督就望江故宅多市酒肴召故人親戚酣宴敦疇昔之歡凡十日既而垂泣贈以金帛謂之曰比者鎮周猶得與故人為歡今日以後則舒州都督治百姓耳自是親故犯法一無所縱境內肅然隋書陳稜傳 太平御覽 資治通鑑 舊志又載入名宦今刪南唐周本宿松人漢南郡太守瑜之後瑜葬宿松即墓為祠子孫居其旁者猶數十家本有勇力嘗獨格猛虎隸楊行密帳下每奮躍先登蒙犯矢石戰罷輒自燒鐵烙其創食飲言笑自如行密取江西危全諷率兵十萬來爭其地本馳至象牙潭一戰

敗之生擒全諷江西以定歷官雄武統軍鎮壽州加安西大將軍太尉中書令西平王本不知書然能尊崇儒士遇僚屬以禮士民愛之徐知誥將代吳本已昏老其子祚懼禍代署勸進表上之本愧恨成疾卒南唐書本傳

周鄴本長子也少驍勇每從其父征討本略地至建州道經險阨被圍垂困鄴躍馬救之手殺數十人翼本而出事知誥典親軍出為滁州刺史知誥受吳禪鄴聞楊濛被執歎憤逾月人亦以此義之後仕至廬江節度使南唐書周本傳

元黃榮六桐城人元末掛車河有吳貴者乘亂而起貪財好殺自稱元帥榮六築六兒城於蔣家山禦之貴不敢逼一方獲全明太祖下安慶欲以保障功官之不肯受遂歸山以琴劍自娛孫永從永樂入京師為羽林衛指揮世襲江南舊志

明楊文勝潛山人元末紅巾之亂於陽城山立寨保障鄉里遠

近居民爭依之太祖征陳友諒文勝來歸擒友諒參政郭泰於

白沙河以功授惠州衛承信校尉世襲千戶危素楊氏譜序

畢銀太湖人元末盜起銀聚眾保障一方歸太祖從征友諒浚

河輸運兵無乏糧洪武元年授英武衛指揮使改授大河衛鎮

守遼東尋卒以其子文代未幾亦卒詔並歸其喪遣官諭祭江

通志 安慶府志

石良宿松人元末盜起良聚義勇築城設寨以捍禦之太祖下

安慶良籍其土與戶獻之從征有功擢武德將軍英武衛正千

戶同邑陳漢亦聚眾保守歸附後以功授大都督江南通志

汪澤懷甯人原籍鳳陽其祖盛從太祖戰鄱陽又從征王保保

以功官都閩鎮兩廣道經安慶卒賜葬於皖遂家焉澤在宣德

閒屢以戰功著仕至後軍都督府都督世襲都指揮使江南通志

柳景懷甯人升曾孫景子文文子珣三世皆鎮兩廣有平蠻功

珣又以討瓊州黎賊功晉少保明史柳升傳 廣西通志 新增

黃應甲字汝第懷甯人少習韜略善騎射嘉靖乙卯倭突至蕪

關應甲以一旅禦之於姑孰倭不得入中武甲科屢遷粵西都

事海賊曾一本犯會城力拒之而遞討古田賊分七道進兵其

三門一道最險應甲身任之出奇搗虛遂入其隘平之又平廣

西哈喇峒賊韋銀豹廣東龍川賊鮑時秀蠻賊蘇觀升周才雄

復擒曾一本餘黨梁本豪晉大都督驃騎將軍世襲指揮僉事

子宮聲以平劉汝國功晉指揮同知瞿九思三朝武功錄 明史李錫傳

張一寵太湖人明季流賊充斥寵兄弟常負母奔竄崇禎八年

史可法追賊過太湖寵與族張穎濱往迎請建堡可法為之請

得帑錢三萬創建未竣賊突至寵率眾守禦十餘日賊約一鐵
工為內應寵得其情設伏如約誘而殲之賊以革裏木穴堡寵
以火禦之皆潰死穴中又誘賊首劉小槐近城與語突出火鎗
斃之賊乃遁去是役也寵一弟中流矢死而一堡得全土人名
其地為上格城至今德之舊志

國朝王斌字憲伯懷甯人先世自遼東來徙順治乙酉從豫藩征
吳楚南粵屢立戰功給都司劄題授千總十二年海寇犯京
口斌駐圖山三戰三捷十六年海氛復熾斌守皖桐告急斌假
八旗舊幟前驅聲言兵至賊驚遁追至六安斬其渠魁以功官
遊擊管常營守備事安慶府志

陳文露潛山諸生明季徐黃兩督撫委鎮崑崙寨屢禦寇圍有
功保全生靈數十萬

國朝屢經獎准敘功固卻不受

潛山縣志

伍雲驩桐城人順治初寇盜未靖應總戎李思泰募以功擢參

將從平八閩兩浙屢破海賊升總兵以老歸

桐城縣志

戴宗禮字爾敦潛山人順治初官廣東廣州副將時有偽總兵
某焚劫寇掠宗禮奉委援剿殲渠魁獲偽印招集餘黨六千人

救難婦三百餘口招其親族給資領回土民勒碑誦德又調剿

江西崖石巢復調征福建懸崖寨招降賊九千餘眾方紀功超

擢以年老乞歸

潛山縣志

吳宗秀字榮生宿松人順治閒官遊擊管廣羅鎮中軍事隨征

妖人王應龍水西安坤等多生擒破陣有功加參將銜

宿松縣志

邵嘉賓字子雋懷甯人康熙癸卯武舉歷官福建海澄中軍守

備海氛大熾孤軍無援城陷被執乘閒逃歸盤山踰嶺七晝夜

始達大軍駐劄之處嘉賓拘於賊營頗能偵其形勢虛實乃導

軍追剿一鼓破之恢復海澄漳廈等地以功進秩左都督江南通志

林鸞字采五桐城人性至孝童年侍父疾刲股以進受經於其

兄鴻工文詞善畫成康熙甲戌武進士官肇慶守備時粵地多

盜奉檄偵緝韶陽單騎入營諭以恩威寇皆馴伏擢濟南都司

以病乞歸有圖書數卷而已江南通志

馬大用字萬宜懷甯人雍正丁未武進士授二等待衛為陝西

火器營參將署花馬池副將乾隆初調沅州沅故民苗雜處苗

恃獷悍多占民田大用單騎直入寨峒反覆開諭苗感而還民

田數千畝擢宜昌鎮總兵轉漳州鎮兼都督僉事時逆匪蔡榮

祖謀為不軌大用夜率騎馳二百里入其巢縛之餘黨悉散移

鎮臺灣甲戌風災親涉鹿耳門拯救四千餘人累擢福建水師

提督濱海賊渠畏服以老乞休卒

賜祭葬諡愨懷甯縣志

葉林春懷甯人官潛山營外委嘉慶元年從征湖北教匪攻兗四方台等處十餘戰多首功授千總旋以重傷卒

恩卹白金三十兩廕其子森懷甯縣志

劉應世桐城武進士官河南撫標守備剿柘城姦民有功嘉慶

元年從征楚匪以勞

賞戴藍翎給都司銜又隨征河南湖北等處教匪累升漢陽游擊以老

致仕歸桐城縣志以上舊志

余觀德潛山武舉咸豐初倡練殺賊九年管帶兆字營戰槎水

阪等處皆勝以功擢藍翎守備從征浙江卒於軍世襲雲騎尉

潛山縣志以下新修

王家琳字寶川太湖武進士藍翎二等侍衛歷貴州下江營遊擊撫綏彈壓苗眾讐服累擢河南河北鎮總兵咸豐二年率師援湖南長沙協守省城血戰擊賊卻之城圍遂解

賞花翎勇號卒於軍

太湖縣志

趙冠英懷甯人咸豐十年以軍功保藍翎把總旋以克復桐城宿松黃梅廣濟保干總加守備銜同治元年克復廬州以守備用從多隆阿援陝二年攻剿大荔縣王閣村羌白鎮回巢擢遊擊三年攻蘇家溝渭城灣花花廟等處回巢并解鳳翔府縣城圍擢參將加副將銜四年進剿甘肅黑城子賊巢克復鹽茶廳城記名總兵五年沒於軍

懷甯縣志

徐鷓字清泉懷甯人初投効撫標隨營剿賊嗣隨

欽差袁甲三剿辦俞家灣賊及帶隊攻破賊圍遞保把總咸豐七年以

督標千總破北路賊圩克復六安又於泗州草溝集擊賊獲勝保都司十年克復鳳陽府城升補甘肅靈州營參將未任九月解鳳陽圍復剿賊定遠十一年戰淮南北岸及泗州靈璧一帶又守滁州皆有功十一月克定遠擊賊固城旋赴淮北辦理團練時已積功保副將矣同治元年會同福建總兵攻廬州四月克之追斬無算五月以總兵會同布政使張學醇總兵吳秀攻克劉李二賊圩收撫金馬胡等圩進剿湖溝七月克湖溝收撫年家樓五十餘圩澹北肅清

賞強勇巴圖魯補貴州清江協副將未任二年領強字全軍駐蒙城助剿苗逆四年署壽春鎮總兵五年調補河南歸德鎮未任嗣以南北肅清保提督

賞換額騰額巴圖魯勇號十年卸壽春事仍畱安徽統帶長淮水師在

營病故光緒元年奉

旨照軍營立功後病故例從優議卹裕祿奏案

吳雲集宿松人由武童帶勇投效軍營歷隨提督鮑超攻剿皖

南北踞逆援剿江西廣東各省嗣隨今大學士直隸總督前

欽差大臣李鴻章剿辦河南山東各股捻逆積功至提督

賞巴圖魯阿巴圖魯勇號復統帶天津練軍同治十三年在營病故奉

硃批照提督軍營立功後病故例從優議卹李鴻章奏案

徽州府

漢梅銷黟縣人爲番君吳芮將從芮率百越佐諸侯伐秦入關

功多封十萬戶侯漢書吳芮傳 徽州府志

陳程靈洗字元滌新安海甯人侯景之亂據黟歙以拒景梁元

帝授靈洗譙州刺史領新安太守封巴邱縣侯後助王僧辨鎮

防及陳武帝殺僧辨靈洗來援武帝遣使招諭久之始降授蘭

陵太守仍助防京口平徐嗣徽有功除南丹陽太守封遂安縣

侯王琳東下靈洗破之於南陵天嘉四年周迪寇臨川以靈洗

爲都督自鄱陽別道擊走之遷中護軍出爲郢州刺史華皎之

反也遣使招誘靈洗靈洗斬之朝廷深嘉其忠周遣其將拓跋

定助皎靈洗嬰城固守及皎退因出軍躡定降之遂克周沔州

擒其刺史裴寬以功進號安西將軍改封重安縣公卒贈鎮西

將軍開府儀同三司諡忠壯配享廟庭南史本傳

隋藺亮歙縣人開皇九年廢歙置新安鎮命亮守之大業之亂

賴以保障嘗屯兵於浦口山鄉人呼其處爲藺將軍巖立祠祀

之一統志

唐汪華字國輔新安人隋末羣雄四起華亦起新安據郡稱王

時天下雲擾而境內無事者十餘年武德四年籍土歸款高祖

賜之詔曰保據州鄉鎮靜一隅可使持節歙宣杭睦婺饒等六

州諸軍事歙州刺史上柱國封越國公唐書高祖紀

程富休甯人隋末起鄉兵推汪華為帥華定六州富力居多唐

封華為越國公富為休甯縣侯鄉人廟祀華以富配食徽州府志

吳仁歡黟縣人永泰九年草賊方清攻破池之石埭據黟赤山

偽置昌門縣以為守備仁歡率鄉人數千從刺史長孫全緒討

平之授朝散大夫因其壘改為祁門縣遂以仁歡為令卒之日

士民思慕立祠祀之元和郡縣志

汪楫績溪人有神力授神策將軍屢戰有功德宗甚寵異之統

志

汪瀆字清叟婺源人乾符四年授衙前都虞候分成三吳嶺東

臨浙境號重鎮中和四年羣盜李重霸等破滅寨鎮瀆與副將

汪適閒道出不意擊之賊遂駭潰楊行密授以歙州團練使後

拒賊死鄉人立廟同邑汪武為本州遊奕使戰守有功楊行密

授以節度押衙以拒陶雅之增賦死鄉人德之為立廟徽州府志

王璧字大獻祁門人唐相王璵之後也乾符中璧與婿鄭傳聚

眾保州里拒黃巢又從楊行密討杜洪擊安全義皆有功行密

承制授以檢校兵部尚書傳以功官保義都指揮使傳弟魯亦

以功官宣州司馬為祁門令有聲新安文獻志

戴護字邦護婺源人黃巢亂與鄉人團結自守討擒山賊余公

美補廂虞侯又擊劇賊汪彖余知禮戮其渠魁一方晏然子壽

代領其眾吳順義中累有戰功官指揮壽卒徐知訓表其子安

為饒州左豹捷指揮甚有威惠饒人立祠祀之徽州府志

程灃休甯人黃巢亂與弟湘洵依東密山為寨協力戰守敗草

賊畢鶴子等楊行密受朝命灃與二弟歸行密表灃為歙州副

統帥湘為牙將灃卒洵代之為東密巖將灃子南節佐父起兵

每戰必為前鋒官兵馬指揮元陳祖仁程榮秀墓志 徽州府志

宋錢忠欵縣人與弟擗並讀書尙氣慨宣和中方臘餘寇未燼

擗兄弟起鄉兵討平之建炎三年金兵將溯浙而西擗率方庚

等逆戰於桐廬金人敗走事聞並補承信郎江南通志

王舜舉祁門人紹聖四年進士官信州通判方臘寇信伏兵破

之寇平入覲授朝請大夫直祕閣徽州府志

胡閎休字良弼婺源人宋史作開封人靖康初中知兵科補承信郎二

帝詣金營閎休結義士劫之何桌禁止之從辛道宗勤王南渡

岳飛辟主管機宜文字以誅鍾子儀功進成忠郎飛被誣死閎

休發憤杜門而卒著有勤王忠義集宋史本傳 江南舊通志 徽州府志

汪介然字彥確婺源人年十八領鄉薦從岳飛軍補宣撫司幹

官又從韓世忠破劉忠等賊補進義校尉收復襄陽六縣歷官

忠訓郎以觀察使致仕徽州府志

元汪同字仲玉婺源人至正間蕪黃寇亂陷婺源同以義兵保

障鄉里收復州縣上嘉其勞拜淮南等處行中書省左丞後見

張士誠心不純欲以計圖之為所覺先受其害時同邑起兵捍

鄉里者有汪斌游德敬徐伯宇許溥化又有休甯程均佐程均

保程善程道安俞茂吳觀國歙江宏宗江日新江憲度羅宣明

劉榮祁門馬國寶李均亮汪均信等其後或死或不出亦有入

明授官者江南通志 徽州府志

明戴貴字安榮績溪人以廕補畱守右衛百戶征五關等處有

功永樂閒征安南又征交趾戰輒先登升指揮僉事調守交趾宣德三年自交趾還為南京守備致仕徽州府志

程佑字彥章休甯人正統己巳舉將材也先寇大同上書乞自

效戰輒先登遂解代州圍天順五年李來寇莊浪佑從白圭出

固原雪夜從閒道覘寇蹤跡還報幕府敗之於紅崖川後復隨

其兄信征山都掌蠻以功升指揮僉事卒於官子敏聰襲徽州府志

項鏞字大聲歙縣人官西安左衛經歷嘉靖二十五年寇掠延

安慶陽鏞請於督府曾銑馳擊破之時銑方事河套鏞謂宜徐

圖之不聽尋調沅州判官甘妹二苗交擾鏞請於督府郭任一

鼓擒之升武岡州同知卒沅民為之立祠徽州府志

李錫字君寵歙縣人世襲新安衛指揮倭警戰數有功歷官江

北副總兵隆慶元年為福建總兵與俞大猷郭成王詔合擊海

賊曾一本生擒之功最鉅擢都督同知六年以征蠻將軍代俞

大猷鎮廣西平樂府江者桂林抵梧州驛道也南北互五百里

賊巢盤互道路梗塞巡撫郭應聘與錫計悉破其巢進世職二

等柳州懷遠徭獠狔獠居獠尤獷悍殺官拒命錫統水師征

之破其巢一百四十進秩二等世襲百戶卒於官明史本傳

王寅字仲房歙縣人少年倣儻為諸生棄去不顧聞少林僧扁

固習兵仗甚精之少林受其術歸而盡破其產辭家遠遊海上

用兵客胡宗憲幕多所匡正不能盡用乃西入陝省鄰省賊起

寅馳告有司屬郡從事縣簿部民兵往賊且近按兵不行寅入

軍中讓之兵乃乘連嶺賊果引去淞兵追及之殲焉晚自號十

岳山人一統志

王詔字維綸歙縣人四川都司僉書蔡百貫為亂當事者用詔

策縛之龍州土司薛兆乾叛詔旨雨雪乘虛破明月關入龍州

遂擒兆乾超拜龍州參將徽州府志

管懋光字子謙歙縣人父籥世襲新安衛指揮懋光以三科武舉為軍門贊畫奉督府胡宗憲命同羅龍文使海寇徐海共謀麻葉因設宴迎葉席閒賭酒葉方出拳懋光自後拽而仆之斷其一臂執送軍門宗憲罷懋光無所見其才僅襲父職而歿徽州府志

府志

吳成器字德修休甯人隨父尉靖州應募擊苗授會稽縣典史倭入會稽擊之於龕山又戰於王江涇陶家堰大敗之曹娥江胡宗憲上其功擢布政司經歷又歙人江應晴者本諸生應宗憲募亦歷戰功世襲千戶江南舊通志 徽州府志

汪之斌字翥武婺源人崇禎辛未武進士授南兵部中軍守備

賊寇江浦以兵八百當數萬眾賊畏其勇盡遯再任安慶巡撫

史可法標下游擊屢有戰功升水營參將以疾歸徽州府志

國朝江起龍歙縣人順治中任廣東水師參將駐白鶴寨當府城入海之口為雷州左臂營圯備弛起龍大加整飭壁壘一新遷副將移營海安口出洋捕盜風發舟覆殞焉屢著靈異雍正九年

封為英佑驍騎將軍之神一統志

舒德輝黟縣人順治十六年叛兵唐士奇蹂躪各縣防祁將弁李芝應之祁門陷欲乘勢入黟德輝率鄉兵禦之於石阡眾曰騎者必李芝俄而一騎至德輝刺殺之則芝帥劉養心也芝懼而遯一城獲全黟縣志

戴朝幹字亮采休甯人康熙丙午舉異才科甲寅滇變以署守

備督理戰艦進剿岳陽寇據君山為壘朝幹以遊兵哨探設疑
幟賊謂大軍至不敢偪遂得要領扼其吭腹背夾擊大捷湖南
以次安戢事平擢洞庭水師營守備旋升江西都司會父卒令
甲無丁艱例以病陳情七上始允休甯縣志

汪乾婺源庠生康熙甲寅閩寇陷城乾率文武諸生詹錦等七
人結義勇殲賊數百人於廬嶺及事平旌七人之閭同時項茂
桁茂楷亦率眾保護鄉里後有張三明王尙權者皆協官軍剿
賊村堡獲全婺源縣志

葉正清休甯人以軍功授千戶調廣東征苗有功歷任參將姪
應元授縣丞不就從正清游霍山並家焉六安州志 舊志六安州流寓 新移
程機字樞一歙縣人康熙乙丑武進士官甘肅提標守備三十
四年

上親征厄魯特振威將軍孫思克出平羅口機請隨軍五月兵至昭莫
多自辰至午戰未決請曰賊屯山頂我軍在下非決死不濟乃
以機為前鋒士皆下馬冒矢石上山機砍殺數人大軍隨之畢
登自未至酉賊大敗獨追至特勒爾濟口復殺二十餘人論功
世襲帶一等拖沙喇哈番後任漕標副將

陸見

上謂大臣曰江南亦有勇健敢鬪者卒子尙煒襲歙縣志
黃堂歙縣人雍正庚戌武進士官湖廣綏甯武岡守備時綏甯
苗不靖堂隨征有功武岡苗亦逆命堂以除夕引兵往擊苗不
備遂遯走後官廣東佛山鎮都司歙縣志 以上舊志
吳定州字老銘績溪人豪俠能得人以花燈蠱案入府獄後為
督辦皖南軍務張芾所用俾統安勇復祁門保藍翎都司會同

官兵進規東流建德銅陵池州咸豐八年調援浙江至武義擊賊走之又同提督周天受進剿收復浦城等縣超保參將給勇號遠以病卒軍中惜之

績溪縣志以下新修

余光祖字典初黟縣監生隨父官費縣募勇剿豹子崗盜咸豐間襄辦本邑練局於林歷山因險為固設伏林莽中賊受重創遂去旋以父喪哀毀卒後數年賊始闢山陷若知曩事者咸追悼之

黟縣志

甯國府

晉魯宗之宣城人父顯遭世亂率鄉人戍守郡城南七十里其地有清水里後人因名其水為魯顯水宗之積穀務濟匱乏禮賓客桓元之亂宗之時為南陽太守起義兵襲襄陽破偽雍州刺史桓蔚又戰於柞溪破偽武貫中郎溫楷後仕至雍州刺史

晉書桓元傳甯國府志

唐左難當一名匡政涇縣人隋末盜起率眾保障鄉里武德三年入朝授猷州刺史封戴國公四年為宣州總管奏以宣州之南陵秋浦二縣置池州六年輔公祏反圍猷州難當嬰城固守公祏敗授宣州都督貞觀十八年以瀘州都督副平壤道大總管張亮伐高麗師旋而卒贈左武侯大將軍諡曰剛

元和姓纂元和郡

縣志唐會要新舊唐書高麗傳

按新唐書高祖本紀武德六年書難當降其實地理志於三年已書於涇縣置猷州元和郡縣志於四年書難當奏置池州則六年降者誤也今甯國府志反據本紀以正誤是益之誤矣

梅知巖宣州人隋末盜起杜伏威起淮南汪華起新安左難當

據涇知巖亦據宣城保障鄉里相為犄角武德初同左難當歸

附唐書高祖紀江南通志

左紹齊難當長子以隨父征高麗功拜都督襲封戴國公弟紹

芳以靖輔公祐餘寇有功後隨侯君集擊高昌還拜指揮使鎮

淮南萬姓統譜

方元蕩旌德人永貞初自左神策將軍授冠軍大將軍掌宿衛

者十餘年從征河北討淮西有功封義成郡王授隴右節度使

不願出外表居長安從之長慶中卒南國府志

方從訓甯國人父虔唐末為楊行密守甯國從訓代之以捍禦

著功十國春秋本傳

宋李材字達才太平人宣和末金圓太原以太學生上書言三

關四鎮國家根本宜遣偏師倍道趨雁門入定襄復忻代截石

頭關絕其歸路俾腹背受敵朝議以為然命陳淬武漢英等將

兵徑收忻代材參幕謀畫居多仕終蘄州通判江南通志

凌震涇縣人侍郎策之後也端宗時為廣州都統元兵夷廣州

震與轉運判官王道夫復取之又復海州後元兵至道夫被執

震敗走又敗於菱塘不知所終宋史帝昺紀萬姓統譜

萬文勝甯國人以功累官福州觀察使總殿前諸軍理宗飛白

書忠實二字賜之卒贈開府儀同三司武安節度使福建通志甯國府志

按宋理宗本紀嘉熙元年六月詔賞蘄州都統制萬文勝守

城之功又孟琪傳有元兵入淮甸江帥萬文勝戰不利之語

府志不載附識之

元徐用和南陵人至正間海氛大熾行中書左丞帖理帖木兒

以用和參贊軍務剿撫有功升都鎮撫上命繪圖傳遠卒賜祭

葬江南通志

胡武孫涇縣人至元庚寅與子有慶佐黃朱二宣尉擒賊有功升湖州路同知有慶尉婺源有三虎入城發三矢皆斃之貫雲

石為作射虎行貫學士集江南通志

明袁洪宣城人壽春籍洪武初從軍歷戰有功官左都督子容尚燕郡主從入京師主進永安公主容以駙馬都尉封廣平侯

宣德三年卒追封沂國公諡忠穆明史公主傳功臣表

何應龍字子驤南陵人元末里中俠少嘯聚應龍斬其渠魁餘俱聽命乃散粟結士部署捍禦鄉井獲安有司上其功授民兵

萬戶明初歸附仍令世襲宿衛京師丙辰從西征至歸德州卒

江南通志

劉福字長卿宣城人太祖下廣德福來歸從克金華復桐廬隨

李文忠北征以功升濟南衛千戶後又從征雲南屢有戰功升

金安前衛指揮僉事封明威將軍卒子傑襲南國府志

方彥忠宣城人明初從何文輝取福建戰功多授武德將軍世襲濟陽衛中所千戶同邑湯貴亦以功授昭武將軍世襲燕山

右衛同知南國府志

李遇文字克顯其先河閒人世襲宣州衛指揮遂籍宣城歷劉河遊擊時小琉球三十六人風潮颶至把總陳嘉謨欲指為倭

賊斬首報功遇不可召通事訊實遣歸升杭嘉湖參將萬曆二

十二年以湖廣副將從陳璘征播逆楊應龍由閒道出不意擒

之露布以聞上喜賜金幣會皮林苗叛從璘擒其酋銀貢追擒

其魁王佗於廣西以功轉左軍府都督鎮貴州卒明史陳璘傳濮陽春所撰李公行略

耿宗元宣城衛人世襲指揮僉事嘉靖閒洋盜竊據漳南宗元擒其首張連升福建都司隨奉敕搜剿沿海寇盜復擒藍松山蘇阿普等升廣東惠潮參將後以截殺倭黨被傷卒於陣甯國府志沈有容字士宏宣城人僉事寵之孫也舉萬曆七年武鄉試爲昌平千總調薊鎮以二十九人迎擊朵顏長昂三千騎於劉家口由是知名再從李成梁出塞並有功遷都司僉書守溆嶼銅山敗倭於彭山洋以二十一舟出海遇風存十四舟遇倭於澎湖縱火沈其六舟倭遂去海上息肩者十年西洋紅毛番長韋麻郎至澎湖求互市稅使高崇召之也有容請往諭指陳利害揚帆去天啟改元以陶朗先巡撫登萊而擢有容都督僉事充總兵官明年廣甯覆遼民走避諸島日望登師救援朗先下令敢渡一人者斬有容爭之立命數十艘往獲濟者數萬人以年

老乞骸骨歸卒贈都督同知賜祭葬

明史本傳

孫鎬號西涯太平人嘉靖丁酉舉人知臨潁縣賊有師尙詔者黥師字於良民之面州縣遇黥者卽指爲賊由是賊益眾鎬下令曰歸農者民抗鬪者賊師字有無不問賊遂解散擢知簡州土司楊氏嫡庶相爭擁兵鬪牆戕官長朝命鎬往以數騎行謂之曰我來詢所宜立嫡庶皆畱鎬寔鎬亦報之每寔嫡庶必俱猜疑漸忘至九月九日鎬指北山曰宜登高嫡庶偕行方命酌忽一吏白曰詔到鎬跪二人亦跪急命持庶下斬之鎬蓋先相此地伏以俟也後晉瑞州府同知歸民爲立祠江南通志查國齡涇縣人萬曆丁未武進士署指揮僉事以擒海寇功爲

閣臣孫承宗所識拔歷官宣府總兵

甯國府志

蕭芬涇縣人萬曆閒以掾吏仕蘄州吏目賊蔡得充聚眾肆掠

芬以計擒之黃梅賊梅堂擁眾稱王芬守宿松禦之亦以計擒
移太甯簿播寇楊應龍叛督師邢玠知芬材徵至軍前芬單騎
入營諭以利害應龍聽命題巴陵縣丞未幾楊酋復叛芬轉運
軍前如期克辦賊平升南川令未仕告歸甯國府志

吳江龍字見田涇縣人萬曆丁未武進士授廣德柘林守備擒
斬海賊桃花老等升貴州都司會有苗寇奉檄襄戎事屢擒賊
酋詔書褒賞協鎮清浪土苗負固單騎馳諭皆感激聽約束遷
廣西昭平參將復諭服廣東諸賊升永甯副總兵告歸卒於家

甯國府志

張載賡涇縣人崇禎辛未武進士時疆宇需才詔依文殿試例
傳臚以王來聘為狀元載賡榜眼武榜三元自此始巡撫張國
維剿賊江南拔置標下屢立戰功賊犯江浦六合間道突安慶

載賡馳救賊望風逃去復犯太湖又逆擊豐家店斬獲無算累

官蘇州游擊

明史陳于王傳甯國府志

管一馴南陵人以三科武舉歷保定大甯都司闖賊犯鎮用連
環礮擊卻之夜巡城遇都御史張寅陰事寅懼遂以通寇誣劾
一馴下獄及賊陷京城逃歸不出甯國府志

國朝唐邦杰字輔展宣城人順治初以總兵官鎮河州平西山巨
寇陝西保安兵亂單騎叩其壁諭以禍福事遂定巡積石枹罕
二十四關修邊城八百五十丈火兒藏野番皆畏威賓服

封榮祿大夫廕一子

江南通志

翟士怡字子黎涇縣諸生順治初土寇蜂起橫掠涇太石青諸
縣聞怡與族弟之珽奉操江檄練鄉勇固寨柵怡任守珽任餉
戊子四月賊至墮伏中斬獲無算己亥海氛自閩歷饒歙闖入

涇境怡合鄉勇計殲其魁一方安堵之珽字廷玉明末授中書舍人賊平當事欲為保薦皆辭不受賞以咏嘯自娛甯國府志

趙嶽生字視公涇縣人順治辛丑武進士授山西陽方口守備增設城堡捐修黃運二河升江南督標右營遊擊江西賊竊發

馳往祁發設伏斬獲招降偽官吳俱勝等撫安難民八千三百餘口歷升廣東春江副總兵北津寨小醜煽亂遣舟師平之推

升總兵以疾歸甯國府志王昶字永思宣城增廣生棄去從軍授千戶楚省督標兵變從

巡撫李之芳督師討亂以功升福建漳浦守備從征臺灣恢復海澄廈門金門攻破漸山十九寨加左都督銜俸視一品授騎

都尉世襲二次遷江西九南營副總兵卒祀昭忠祠子宏緒亦以臺灣功加左都督銜候補游擊甯國府志

劉宏基字潤伯宣城人少從沈壽民楊廷樞周鑣遊性孝友工文詞以順治辛卯武舉授徐州守備歷福建都指揮使驃騎將軍上護軍時海氛未靖宏基以撫代剿軍律嚴明專閩十載有古名將風卒於官閩民祠祀之同族劉驤康熙壬辰武進士選一等侍衛宿衛扈從累蒙

賜資歷官廣東羅定副總兵卒兵民祠祀甯國府志

查之愷字維勤涇縣人康熙丁巳以行伍從巡撫吳興祚解泉州圍復永春等縣戰輒奮勇先登尋從復金門廈門蕩平海氛

以功歷官至廣東右翼鎮標中軍游擊食一品俸甯國府志胡鎮遠字定侯涇縣人以武舉效力陝西敘功授長沙協都司

督修武漢江隄以節省之費貯為歲修費後以委勘遠近烽墩四旬內往返八千餘里積勞成疾卒甯國府志

崔彪字從翼太平人以行伍從軍追剿海逆克復海壇南日平
海湄州崇武臭塗等處直抵金門廈門克澎湖三十六島皆有
功補臺灣水師左營紀功授左都督仿古屯田法教以墾闢軍
民安堵歷任直隸撫標左營遊擊食一品俸甯國府志
郭鎮邦號臨菴旌德人康熙己未武進士庚申從鎮平將軍徐
治都征蜀寇譚宏頭被重傷辛未攻克雲陽萬縣授廣西平樂
副將中軍時富川賊猖獗鎮邦率兵殲其巨魁升直隸撫標遊
擊癸未二月

聖祖仁皇帝巡幸五臺迎伏道左蒙

恩顧問驗其舊創

賜蟒服累遷至湖廣寶慶協副將卒年七十五同邑宋之斌以武舉歷
官江西提標左營游擊隨軍征剿有功後防禦撫州長沙武岡

等處俱著勳績甯國府志以上舊志

翟藩字南屏涇縣人咸豐三年聯絡諸村團練保衛鄉里四年
秋賊屢犯境不得入竄東壩藩遣子率眾往援復募勇偕吳楠
破蕪湖魯港賊巢進剿繁昌荻港皆有功涇勇名聞遠近吳楠
最著倡之者藩也五年春積勞卒方宗誠文集以下新修

汪麗金字芝田旌德舉人咸豐七年以知縣揀發貴州署安化
時苗教各匪並起麗金連敗賊於張家寨平馬鬃嶺各巢計擒
銅江賊首解印江圍又擊賊於藤溪各村思南肅清調署仁懷
殲構疊練總陳志賢撫其眾扼石達開餘黨於茅台酒分兵焚
其巢以功升同知直隸州調署貴定擊白號教匪走之同治三
年補郎岱廳同知思南賊復熾再調仁懷兜剿降之積勞卒官

旌德縣志

吳登鼇字雲門宣城衛籍武舉官湖北漢陽營游擊咸豐二年九月漢陽城陷打仗受傷殺賊甚多四年禦賊於黃州龍望山獲勝進剿德安克復應山應城雲夢德安等城嗣防長江埠傷發卒於軍

宣城縣志

池州府

明陳賢甫貴池人元末盜起集鄉兵自保與趙普勝等相拒數年常遇春下池州賢甫率眾歸附一州獲全

池州府志

徐琇青陽人嘉靖初以貢授會昌主簿攝縣事為民償逋賦會湖廣蠻叛臺臣以琇嫺韜略奏加監紀銜督師征之累戰皆捷擒其魁敘功擢兵備副使卒於軍加恩遣官致祭

池州府志 青陽縣志

紀元憲貴池人萬曆閒以武進士歷官右軍都督僉事賊袁八老跳梁數載元憲擒之敘功升右都督以年老致仕歸

池州府志

檀武臣字思吾建德人隆慶二年以武進士歷神樞營參將為

戚繼光所重

江南通志 池州府志

何自謙銅陵人萬曆閒以貢授瓊州府通判時朝廷遣中使至瓊與羣黎市珍異屢有激變相劫殺者自謙從中調護之得無事後代守入覲回中途聞黎變大作疾馳渡海合雷陽三路兵搗黎穴冒暑深入擒其渠魁黎始帖服因條撫黎數事上之詔如議敘功進長史致仕

江南通志

金文光石埭人萬曆甲辰武進士官福建游擊剿紅毛倭寇有功丁父艱去位崇禎初起為江西南贛參將會屬境土賊踞九連洞為寇流及閩廣文光以兵深入剿平之贛人為立生祠

江南通志 池州府志

方儀鳳貴池人萬曆丙辰武進士第一授廣東屯田都司僉書

大興屯政以給軍食歷廣東參將紅毛劫掠海上督兵卻之擢
南路副總兵著韜略全書行世子懋昌能世其學以萬曆武進
士歷貴州安順副總兵崇禎癸未調泗州護陵副將擒叛將王
承成黨劉超撫臣移爲本郡城守江南通志
池州府志
施臺臣青陽人天啟壬戌進士知龍巖縣傍海紅毛入寇臺
臣督民兵逐之寇遂去邑賴以全又建德馮時來由舉人知江
安縣土番寇掠時來集兵固守賊攻城數月不能下始解圍去

江南
通志

金孔器字連如建德人崇禎初以貢知蒲臺縣有奸民據海島
寇掠傍海諸邑孔器嚴守備以待之賊不敢犯調江西崇義剿
平土寇擢南康同知南康地接楚界流寇蹂躪山賊往往勾引
爲應孔器隨宜撫剿奪還所掠婦女二千餘人郡境以安後致

仕歸蒲臺崇義南康皆立祠祀之江南通志
池州府志

曹禹芳字時若貴池人少習騎射於皖熟悉濱江要害形勢嘗
條列防江十策上操撫李日芄悉中機要時左良玉兵敗於獻

賊奔襄陽降軍悍卒往往借左軍爲名恣剽掠蘄州守將王允
方儀鳳
傳作承成爲亂首破建德侵池陽禹芳椎牛犒士踴躍登陴夜

率奇兵擊之賊驚退復追擊之獲其鎧仗城得全撫軍委署池
陽四營都司待事定題奏而禹芳已創裂卒人皆惜之池州
府志

國朝章耀石埭人順治初任池陽城營守備時荏苒未靖耀撫剿
餘寇所向蕩平以功升汀州遊擊又有劉士毅者貴池人順治
初爲皖撫標左營都司剿六峯山寇招撫鄰郡山寇潛山太湖
宿松及徽甯等處皆安堵無恐以功進驃騎階池州
府志

曹曰璋字繼武貴池人康熙癸未武進士第一授二等侍衛從

征厄魯特有功出為山西利名路參將累擢陝西興漢等處總兵官漢江暴漲州城盡圯曰瑋督軍士晝夜巡防感寒疾卒江上舊志以

通志以
上舊志以
征厄魯特有功出為山西利名路參將累擢陝西興漢等處總兵官漢江暴漲州城盡圯曰瑋督軍士晝夜巡防感寒疾卒

重修安徽通志卷二百三十一

人物志

武功

太平府

漢抗徐字伯徐丹陽人初試守宣城長移深林椎髻烏語之人置縣下境內無復盜賊後為中郎將宗資別部司馬擊大山賊公孫舉等破平之封烏程東鄉侯五百戶遷大山都尉盜賊望風奔亡與度尚俱為名將遷長沙太守時荊州兵朱蓋等徵戍日久財賞不贍忿恚作亂與桂陽賊胡蘭等攻桂陽眾至數萬乃詔徐與度尚并勢討擊斬蘭等後卒於官後漢書度尚傳張磐字子石丹陽人為交趾刺史胡蘭既破餘賊走蒼梧度尚懼為己責偽言蒼梧賊入荊州界於是徵磐下獄會赦見原磐

重修安徽通志

卷二百三十一

人物志

武功

太平府

不肯出吏詰其故磐曰胡蘭作難荆州餘黨散入交趾磐身膺

甲冑涉危履險討擊凶患斬殄渠帥餘燼烏竄冒頓還奔度尚

懼磐先言畏罪見誣磐備位方伯為國爪牙事有虛實法有是

非豈甘忍恥苟免乞傳尚詣廷尉面對曲直廷尉以狀上詔書

徵尚辭窮受罪以功見原磐以清白稱終廬江太守後漢書度尚傳

陶謙字恭祖丹陽人少察孝廉除舒令郡守不樂而謙在官清

白無可糾劾少察以下舊志廬州府名宦引三國魏志傳注文今移并由州郡仕至徐州刺

史擊黃巾大破走之境内晏然李傕郭汜之亂四方斷絕謙聞

道奉貢詔遷徐州牧加安東將軍封溧陽侯曹操父嵩避難過

琅邪謙別將襲殺之操遂擊謙謙求救於劉備及備至徐謙已

人病謂糜竺曰非此人不能安此州也因以州讓備而卒後漢書本傳

三國志本傳

晉陶回丹陽人祖基交州刺史父抗太子中庶子回初為王敦

參軍王導引為從事中郎遷司馬蘇峻之亂回言於導請早守

江口及峻將至回復謂庾亮曰峻知石頭有重戍不敢直下必

向小丹陽南道步來宜伏兵要之可一戰而擒也亮不從峻果

由小丹陽迷失道行無部分亮甚悔之王師敗績回還本縣合

義軍千餘人與陶侃溫嶠并力攻峻又別破韓晃以功封康樂

伯遷吳興太守時人饑穀貴回上書不待報便開倉割府郡軍

資數萬斛以救之一郡獲全既而下詔會稽吳郡依回賑恤二

郡賴之徵拜領軍將軍咸和二年徙護軍將軍未拜卒晉書本傳

甘卓字季思丹陽人世仕吳卓入晉以討石冰功賜爵都亭侯

元帝渡江授前鋒都督揚威將軍歷陽內史討周馥征杜弢以

功進爵南鄉侯拜豫章太守尋遷湘州刺史復進爵于湖侯以

安南將軍梁州刺史假節督河北諸軍鎮襄陽王敦謀逆遣使告卓卓使參軍孫雙詣敦諫止敦大驚遣樂道融要卓俱下道融本欲背敦因說卓襲之卓遂露檄遠近陳敦肆逆奉表詣臺遷卓為鎮南大將軍侍中都督荆梁二州諸軍事荆州牧卓雖懷義正而心不果決軍次豬口累旬不前還軍襄陽忽舉動失常襄陽太守周慮密承敦意襲卓於寢四子皆遇害大甯中追贈驃騎將軍諡曰敬

晉書本傳

明吳昇字彥高當塗人元末盜起昇以郡兵擒劇賊方揚蔣山蕭三等補當塗尉太祖渡江昇來歸擢總管元守臣初遁復屯近郊來攻昇使同邑朱化隆吳大通宋成伏襄城橋下擊而擒之從擊金陵擒同知觀音奴又從取徽州常州嚴州皆有功弟晟子興次子振皆死王事吳元年克平江以其父裕知府事而

裕已卒

江南通志太平府志

邢珣字子用當塗人宏治癸丑進士正德初歷官南京戶部郎中忤劉瑾除名瑾誅起南京工部遷贛州知府招降劇盜滿總等授廬給田撫之甚厚後討他盜多得總力南安龍川盜大起據橫水桶岡左溪諸峒都御史王守仁會征珣議先橫水左溪遂以贛兵出不意先破二峒直抵桶岡冒雨進兵誅其魁賊乃平增二秩逆濠之叛以厚賞誘滿總總執其使送珣即日以師會守仁次樟樹建議疾馳南昌濠返兵相拒值南風猛與伍文定緝葦灌油火舉風發遂大破之宸濠就擒授江西參政以左布政致仕贛人思之立報功祠於黉宮祠守仁以珣為配

伍文定傳太平府志

徐州當塗人嘉靖中官羅源典史鄰寇犯境令方他出洲矢志

固守製藥弩以退敵明年賊復率眾來攻洲力卻之追至古田界手刃七人三戰三勝賊不敢復犯城賴以全

福建通志

孫吳初名國寶當塗人家於老營嘉靖中以武略登進士任廣武守備時以斬級功賜名吳累遷都督僉事為協守老營副總兵官吳以老營地當絕塞屢經大敵乃大修城垣守禦之具畢備且請建立學校訓練之暇則以講藝敵屢入擾多所斬獲

統

志山西名宦

陶旺當塗人先為福建都指揮僉事剿捕龍縣叛賊羅三福等五百七十餘人平其餘黨巡按御史趙奎以其智勇廉謹薦之

於朝遷都指揮同知

福建通志新増

裴希度號綠野當塗建陽衛人世襲指揮僉事喜讀書精騎射由把總積功歷福建總兵官海寇鄭芝龍橫掠沿海州郡倚巨

艦為長城風帆飄忽瞬息千里希度伺其將至豫伏死士數百

船中挾撓鉤長釘銳斧以鉤急挽其船使傍已船躍入斧斫之

賊死無算芝龍乃乞降沿海以安

江南通志

俞茂勳字繩武蕪湖人父昌齡以歲貢司訓池州升山東泗水

令茂勳從父之任會白蓮教妖賊徐鴻儒丁寡婦等倡亂築重

圍以攻泗茂勳突圍至都督楊肇基帳下請援遂以援兵至射

書入城約夾攻賊潰走尋撲滅假茂勳守備父病隨歸後中崇

禎壬午科武舉左良玉敗歸襄陽兵不戢警及蕪湖茂勳糾義

兵扼之三日會左懋第以書責良玉乃撤去茂勳授守備終於

家

太平府志

謝雲駒字時駕當塗人由明經授儀徵訓導時淮陽賊寇不時告急雲駒密偵伺嚴守備賊至四面攻圍躬荷戈登陴鼓舞士

卒運石傳餐無時稍懈賊退復單騎四鄉安撫勞慰巡撫史可

法曰廣文中乃有此人敘功應不次遷擢會病卒太平府志

國朝李茂根字帶湖當塗人

大兵南入浙督帥張存仁知其才以杭州知府擢浙江布政司參

議分守杭嘉湖土寇蜂起湖州失守茂根率騎兵三百銜枚抵

城下賊疑兵大至夜遯散入長興等處茂根多方招撫民賴以

安以疾歸卒於家太平府志以上舊志

廬州府

隋陳稜字長威廬江襄安人父峴譙州刺史陳亡廢於家高智

慧等作亂欲推為主峴拒之稜曰不如偽許之別為後計遂使

稜告於柱國李徹請為內應徹未至而謀洩峴遇害稜僅以身

免煬帝即位授驃騎將軍虎賁郎將與張鎮周泛海擊琉球平

之進右光祿大夫楊元感之亂稜擊斬其所署黎陽刺史元務

本尋奉詔於江南營戰艦破彭城賊帥孟讓賜爵信安侯煬帝

幸江都遇弒稜集眾縞素為發喪改葬論者義之後為杜伏威

所害隋書本傳

唐袁襲廬江人秦畢之亂高駢辟楊行密為行軍司馬俾率所

部赴難襲言於行密曰高駢倦於政事聽惑妖妄甯非天將贊

於公耶行密善其言乃移檄諸州集兵數萬至廣陵破賊入城

招輯編戶會孫儒兵至襲曰今城壁未完賊且盛不如避之先

是海陵將高霸擁眾未附行密將令以兵屯天長扼儒來路襲

曰霸擁大眾心持兩端若使居天長是自扼也可因犒其士卒

擒而斬之行密遂斬霸而併其兵行密聞孫儒至復欲遯海陵

襲曰不若歸合肥繕甲兵再議攻取乃走廬州久之欲取洪州

襲曰江西兵強食足勢未可圖趙鎰新得宣州怙亂殘暴眾心不附宜說和州孫端上元張雄使侵其地公自銅官渡江會之取鎰必矣遂擒鎰入宣州九國志本傳 十國春秋本傳

朱延壽舒城人事行密破秦彥畢師鐸趙鎰孫儒功居多壽州刺史高彥溫舉州入朱全忠行密襲之延壽拔其城即表為淮南節度副使取黃蘄光三州遷壽州團練使昭宗在鳳翔詔延壽圍蔡以披全忠勢擢奉國軍節度使田頔之附全忠與延壽

陰約行密遣辯士召延壽揚州禽殺之唐書本傳田頔字德臣合肥人行密據廬州頔謀為多攻趙鎰於宣州鎰

出逸見禽攻常州殺刺史杜稜會孫儒南略頔等屯丹陽與戰卒禽儒乃表頔甯國軍節度使累遷檢校太保同中書門下平章事已平馮宏鐸至揚州謝行密左右求貨不已又請池歛為

屬不許頔始怨將還指府門曰吾不復入此後為臺濛所殺頔居恆蓄死士號爪牙都所向無前又善為治通利商賈尤善遇士以是杜荀鶴等多為之用唐書本傳 十國春秋本傳

臺濛字頂雲合肥人少為金牛鎮將行密據合肥來歸從征秦畢趙鎰俱有功遷楚州刺史天復三年田頔叛行密歷數諸將無敵頔者乃謂濛曰非公不可濛入其境即翻陣以往軍士俱

笑其怯濛曰頔宿將多謀當自過防翌日果遇陣于廣德濛先以行密書遺頔將校皆下馬拜受因其擾亂麾眾擊之頔大敗

遂圍宣城頔出求戰為外軍所殺行密承制加濛檢校太保宣州觀察使九國志本傳

高勛舒城人行密原文作太祖起淮南辟掌書記時軍興用度不足欲以茶鹽易民布帛勛曰兵火之餘十室九空又漁利以困之

將復離叛不若盡我所有易鄰道所無選賢守令勸課農桑數年之間倉庫自實田頽聞之曰仁人之言其利溥矣十國春秋本傳

戴友規廬州人行密原文作太祖鎮宣州時與孫儒戰失利欲退走

友規曰儒來氣銳其眾不可敵而可久以敝之淮南士民從公

渡江及自儒軍來降者宜遣將護送歸淮南使復生業儒軍聞

淮南安堵皆有思歸之心人心既搖安得不敗從其計遂大破

儒兵十國春秋本傳

李友合肥人有膽略善撫士卒大順元年將兵二萬屯青城略

地常州已進拔蘇州走浙將沈粲爭先排陳勇冠一軍遷尚書

蘇州刺史孫儒陷蘇州見殺贈太保十國春秋本傳

按舊引十國春秋各傳俱改太祖作行密茲於朱田二傳改

用唐書餘則兼引九國志以避更改原文之嫌至高戴李三

傳別無徵引仍從舊志

梁王景仁合肥人初名茂章事楊行密起淮南臨敵身先士卒

梁太祖遣子友甯攻王師範於青州景仁以步騎七千救師範

度友甯兵困乃出戰大敗之斬友甯梁以兵二十萬倍道至景

仁閉壘示怯伺怠毀柵而出戰酣退坐召諸將飲酒已而復戰

梁兵又敗景仁還梁急追之遣裨將李虔裕設覆以待虔裕戰

死梁兵以故不能及得全軍以歸行密死子渥自宣州入立以

景仁代守反求宣州故時物景仁不與渥攻之奔於錢鏐梁太

祖遣人召之以為甯國軍節度使五代史本傳

吳陶雅合肥人從太祖討定舒州盜吳迴李本等攝舒州刺史

已而擊趙乾之於九華破之授池州制置使改團練使有惠政

寬厚得民景福初田頽攻歙州不下歙人曰得陶雅為刺史請

聽命卽命雅爲歙州歙人納之雅盡禮見故刺史裴樞送之還朝久之加檢校司空潯陽公高祖時遷觀察使累加都團練使治歙凡二十年卒雅鎮靜寡言善用兵天祐中充西南招討使援陳詢於睦州一夕軍中夜驚士卒多亡去雅安臥不動須臾自定亡者皆還無何大敗浙兵歸世咸服其有應變之略

本傳 舊志 入唐 新移

劉威慎縣人仕太祖爲牙將與安仁義等破劉建鋒有顯功已而孫儒屢勝太祖太祖欲退守銅官威言賊倍道遠來可以不戰疲之儒遂爲我所禽授廬州刺史遷觀察使是時四郊多壘井邑蕭然威內撫外禦廬州以甯擢鎮南軍節度使撫州危全諷帥兵十萬來攻洪州時守兵裁千人威密遣使告急於廣陵而日召僚佐奏樂宴飲全諷疑不敢進及周本將兵救高安全

諷被執而洪州獲全徐溫常內忌威欲興師致討威詣廣陵以明無二心隨遣還鎮居數年卒

十國春秋本傳 新增

秦裴慎縣人從太祖爲牙校引兵三千攻崑山拔之烈祖時充西南行營都招討使將兵擊鍾匡時於江西諸將請阻水立寨裴不許俄匡時將劉楚據其地諸將已咎裴裴曰匡時驍將獨楚一人吾正欲以要害誘致之耳頃之破寨執楚進陷洪州匡時以歸改洪州制置使及劉存與潭軍戰沒復授鄂岳觀察使會潭人入寇裴遣弟師鐸師虬乘戰艦先往裴登黃鶴樓以望乃以平頭舫顧小校曰但乘此展旗奪潭人船以戰及與師鐸軍合乃建大將旗潭人矚眙因擊敗之裴在治七年積軍儲二十萬開青山大冶公家仰足

十國春秋本傳 九國志本傳

王綰合肥人仕太祖爲海州副使天復中青州王師範以沂密

內叛乞師太祖遣臺濛及縮將兵援之已拔密州進攻沂城謀者偵城中偃旗息鼓縮謂此不可擊諸將堅欲攻之縮不能止乃設伏以待攻者果不克敵乘勢追之伏發得濟其用兵多類此武義元年加鎮東大將軍遷百勝軍節度使卒

十國春秋本傳舊志入

唐新移

張崇慎縣人官至廬州觀察使光州將王言作亂崇不俟命引兵討定高祖獎賚有加久之擢德勝軍節度使武義改元加安

西大將軍

十國春秋本傳

南唐王會廬江人本名安少事楊行密臨戰升高望敵會捧唾壺侍側忽有卒持稍徑趨行密莫能禦者會置壺於地引弓一發而殪徐納弓歿中復捧壺立行密喜曰汝器度如此必當貴積功至袁州刺史徐知誥代吳為百勝軍節度使虔州地與嶺

南接使者往來賜名以避漢王祖諱

南唐書本傳

王輿合肥人縮之弟也初從周本攻危全諷視其水柵部分誘將指山頭一小營謂輿曰爾為我取之答曰公不以輿為不武請攻此柵本大喜即命之輿乘輕舟破其前鋒遂拔柵入積功為都虞候歷鎮海節度留後南唐受禪移鎮鄂州後加平章事

十國春秋本傳

鍾秦章合肥人徐溫張灝爭吳權秦章為溫刺灝擢滁州刺史已而隨周本圍蘇州本敗於黃天蕩秦章為殿多樹旗幟恭蔣中追兵不敢逼而還遷壽州團練使順義中有告其侵市官馬者知誥遣王稔代之欲治秦章罪溫不可改秦章饒州刺史

十國春秋本傳

李章廬江人從楊行密為騎將與朱瑾相說瑾殺徐知誥溫誅

瑾黨已斬五人次及章厲聲曰四郊多壘而斬壯士耶馬仁裕為言於溫釋之以功累遷雄武軍都虞候左街使善撫士卒禁戢左右周本卒以百勝節度移鎮廬州南唐書本傳

朱令贇合肥人匡業從子椎額鷹目趨捷善射歷鎮南節度使宋師圍金陵令贇赴難至虎蹲洲合戰令贇所乘艦尤大建大將旗鼓宋師舟小聚攻之令贇以火油縱燒宋師不能支會北風反燄自焚令贇惶駭赴水死十國春秋本傳

宋劉虎廬州人隸軍籍趙善湘帥淮西一見偉之畱帳下屢有戰功紹定四年復鹽城淮安敗金將於盱眙擢鎮江副都統制拒元師於五河乘風縱火敗之虎中流矢洞腹達背悶絕復蘇

意氣彌厲擒阿朮魯等十將又援壽春解圍奏凱進利州觀察使拜合肥縣侯寶祐元年知秦州箭創毒發卒兄海從弟師勇

師賢師雄皆為名將宋史理宗紀廬州府志

按劉虎宋史無傳理宗本紀紹定五年有云泗州路分劉虎焚斷盱泗橋過金兵陷祐五年十二月詔壽春守臣劉雄飛元兵圍城捍禦有功官三轉六年二月以劉雄飛知壽春府節制屯田軍馬劉虎劉雄飛疑為一人而與廬州府志小異今姑依府志錄之

明楊璟合肥人本儒家子從太祖以管軍萬戶歷行省平章政事洪武元年克永州進攻靖江決西濠水築土隄五道傅於城克之先是張彬攻南關為守城者所詬欲屠其民璟甫入立下令禁止民乃安三年封營陽侯五年充副將軍從鄧愈討定辰沅蠻寇再從大將軍徐達鎮北平練兵遼東卒追封芮國公諡

武信子通嗣明史楊洪傳

廖永忠巢縣人從其兄永安迎太祖於巢湖卽副永安將水軍渡江屢有功永安陷於吳襲兄職總其軍陳友諒犯龍江大敗之遂從伐友諒攻江州州城臨江守備甚固永忠度城高下造橋於船尾名曰天橋以船乘風倒行傳於城遂克之戰鄱陽湖與俞通海等乘風縱火焚其樓船又以六舟深入搏戰旋繞而出敵驚爲神友諒死陳理降太祖書功超羣將智邁雄師八字賜之洪武元年拜征南將軍由海道取廣東進取廣西兩廣悉平三年從徐達北征還封德慶侯明年從湯和伐蜀先入夔府直搗重慶蜀地悉平帝又製文旌其功八年以不法賜死明史本傳趙庸廬州人與兄仲中結水寨屯巢湖歸太祖仲中累功爲行樞密院僉事守安慶陳友諒陷安慶仲中棄城走太祖斬之而以其職授庸戰康郎山與通海永忠駕六舟入功相等平武昌

園平江下河南克太原皆有功二年從常遇春北追元帝師遇春卒命庸爲副將軍同李文忠北伐論功最封南雄侯後坐

胡惟庸黨死明史廖永忠傳

吳復字伯起合肥人歸太祖於濠以功官萬戶守常州張士誠兵奄至敗之追至長興又敗之於高橋太湖及忠節門士誠奪氣洪武元年授懷遠將軍累從征伐十一年從沐英再征西番師還論功封安陸侯後從傅有德征雲南卒於普定追封黔國

公諡威毅明史本傳

俞通源字百川巢縣人號國公通海之弟海無子通源嗣其官從大將軍征中原戰必先登洪武三年封南安侯二十二年詔還鄉賜鈔五萬置第於巢未行卒明史本傳馬雲合肥人官指揮僉事洪武四年偕葉旺鎮遼東元納哈出

以眾至雲設奇破之進都督僉事十二年命征大甯捷聞受賞

召還京卒雲之鎮遼也墾田萬餘頃遂為永利遼人德之嘉靖

初命立祀明史葉旺傳

宋炳字景光合肥人明初饒州總制聞蕭名來寇與知府陶安

嬰城拒守明日賊架船百艘犯南門炳率眾射之矢如雨注俄

報賊攻北門門外有浮圖賊躋瞰虛實炳設疑兵眩之注以火

箭賊技無所施會江西援至賊奔潰捷聞賞勞有差城東西北

三面卑隘炳增高之又建旗纛廟守禦廳譙樓民不知擾江西通志

袁義廬江人本張姓德勝族弟也德勝死始來附賜姓名以功

為興武衛指揮僉事從北征功最從定陝西攻慶陽張良臣兵

驟至薄義營堅壁不動俟其懈擊破之又從沐英征雲南雷鎮

楚雄為楚雄衛指揮使嘗入朝帝加慰勞以其老命染鬚鬢還

任以威遠人歷二十年墾田築堰軍民德之明史甯正傳

金朝興巢縣人從渡江累功為都督僉事兼秦王左相洪武四

年從伐蜀七年從李文忠取和林所至以偏師取勝雖未為大

帥而功出諸將上封宣德侯世襲指揮使十五年從傅友德征

雲南駐師臨安撫輯有方軍民俱悅進次會川卒追封沂國公

諡武毅十七年改襲世侯子鎮嗣嘉靖初立廟於雲南額曰報

功明史本傳

花茂巢縣人以功歷都指揮同知世襲指揮使上言廣東南邊

大海姦宄出沒東莞筍岡諸縣逋逃蠻戶附居海島飄忽不常

難以訊詰不若籍以為兵庶便約束又請設沿海依山二十四

衛所築城浚池仍於山海要害地立堡屯軍以備不虞皆報可

進都指揮使卒子榮嗣次子英亦以軍功為廣東都指揮使有

聲明史本傳

葉昇合肥人左君弼據廬昇自拔來歸洪武三年論功僉大都

督府事從取蜀出鎮西安討慶陽叛寇平西番擒洮州番酋並

有功封靖甯侯又同胡海討平湖廣峒蠻雷屯襄陽凡三平叛

蠻再出練兵後坐胡黨死

明史本傳

陳文合肥人少孤奉母至孝元季挈家來歸累立戰功積官都

督僉事卒追封東海侯諡孝勇明武臣得諡孝者一人而已

明史

蔡遷傳

孫世陳清皆巢縣人以隨征功官都督僉事卒世追封富春侯

諡忠勇清追封合浦侯諡崇武

明史功臣表

高顯合肥人以功追封汝陰侯諡武肅

明史功臣表

左君弼廬州人元末據廬州太祖攻之走汴元使守陳州吳元

年遣使招諭君弼猶豫不決乃歸其母於陳州始感泣降為廣

西指揮僉事以副總兵平上思州黃英傑及英覽之亂威震兩

廣

一統志廣西名宦明史葉昇傳江南通志

郭彥仁無為人李文忠用兵淞西為參謀多所裨益時胡大海

與文忠有隙太祖命彥仁調和之賜金幣蔣英戕胡大海彥仁

擊走之入金華撫其民李祐之殺耿再成彥仁屯縉雲遏其侵

軼以功授嚴州知府

廬州府志

李榮廬州人官廣武衛指揮僉事洪武五年從李文忠北征出

居庸馳至土刺河與元蠻子哈刺章戰追至渾河文忠馬中流

矢榮以所乘馬授之持短兵步鬪奪敵馬乘之遂破敵

明史李文忠傳

王玉廬州人與弟瑛同歸太祖畱衛帳下從渡江戰比有功授

右副元帥擒偽漢平章李明道從征張士誠其子虎手擒張士德玉卒以瑛代領其眾張士誠侵新城瑛衝其中堅遂大敗之

洪武二年加明威將軍從北征病歸歿於毘陵江南舊志

趙馘廬州人自巢湖來歸從渡江功多官行樞密院判官以舟

師略太湖馬蹟山降吳將王貴敗呂珍於施口從攻趙普勝於

樅陽下九江皆有功又楊重三戈預皆廬州人並從征有功廬州府志

鄭祥合肥人以功官指揮僉事洪武十四年從征雲南克大理

沐英鎮雲南遇有征伐多以命祥二十年浪穹羣蠻為亂祥乘

其未集掩而殲之同邑胡通從廖永忠征廣東功多歷官前軍

都督僉事又甯仲瑛王珪蕭春王雄韋權皆合肥人並從征有

功江南舊志廬州府志

許榮字榮卿舒城人元末立屯烏沙河保鄉里趙雙刀陷廬州

不敢偪修七門諸堰供灌漑之利廬州歸附榮封府庫籍軍民

之數上之授廬州同知廬州府志

楊興巢縣人初事雙刀趙棄之來歸平陳友諒破張士誠定中

原皆有功授指揮僉事討廣西叛蠻克郎八保及三千八萬向

家砦招降土司王萬全等升貴州衛指揮世襲同邑楊廣亦自

雙刀趙所來歸授管庫千戶從沐英征洮州中矢卒賜葬令詞

臣撰碑銘以昭勳節又楊義唐賀張旭曹貴高謙倪旺金斗輔

陳奉成武周通宋允丁襄尹貴陳仲良皆巢縣人並從征有功

廬州府志施質無為人元末為義兵長有寇至泥汊聲言攻城質往禦悉

擒斬之後來歸從征沙漠子世職又朱文汪源皆無為人並從

征有功

廬州府志

劉真合肥人以功官左軍都督充大甯總兵燕師起與陳亨卜萬移師出松亭關駐沙河謀攻遵化亨欲降燕畏真與萬不敢發乃行反間誣萬下獄死而真不知也燕從間道疾攻大甯真還救亨於夜二鼓襲真真單騎走廣甯永樂初以真為大都督鎮遼東愧恨而卒

明史陳亨傳

鄭亨合肥人父用洪武時積功為大興左衛副千戶請老亨嗣職燕師起以所部降封武安侯永樂元年充總兵官備宣府相度形便為高城深池浚井畜水規畫周詳後莫能易成祖凡五出塞亨皆在行閒仁宗即位鎮大同宣德九年卒於鎮贈漳國公諡忠毅妾張自縊以殉子能嗣

明史本傳

徐忠合肥人父用以功歷副千戶忠襲父爵征北有功洪武末

鎮開平燕破居庸懷來忠迎降入京師封永康侯事繼母以孝

閨夜歸揖家廟而後入卒贈蔡國公諡忠烈

明史本傳

郭亮合肥人為永平衛千戶降於燕即命為守戰守有功封城安侯世伯爵卒贈蔡國公諡忠壯妾自縊以殉子晟當嗣伯特

命嗣侯

明史本傳

李讓舒城人父申從太祖征伐有功讓以燕儀賓從起兵取大

甯戰白溝河有功永樂初封永平公主讓進駙馬都尉封富

陽侯卒贈景國公諡恭敏

明史公主傳功臣表

史昭合肥人永樂初積功至都指揮僉事八年充總兵官鎮涼州平土軍虎保老的罕之亂移鎮西甯請設學校從之仁宗時曲先衛都指揮使散即思邀劫西域使臣昭率參將趙安等討平之璽書慰勞以征西將軍鎮甯夏請於花馬池築哨馬營邊

備大固進右都督以老召還卒

明史本傳

巫凱合肥人

明史作句容人

由百戶積功至都指揮同知宣德元年升

都僉事充總兵官鎮守遼東性剛嚴饒智略在鎮三十餘年威

明史本傳

惠並行邊備修飭前後守遼者皆莫及焉

明史本傳

王勝字子奇合肥人官福州都指揮僉事景泰初海上賊起勝

悉招撫復業未幾復聚為寇殺掠官軍勝又諭之納款上聞賜

金帛事母極孝後以孝行旌

福建通志

張瓌合肥人官福建行都指揮僉事正統二年破龍巖等賊還

卒於晉安驛

福建通志

程鑒字本虛合肥人襲指揮僉事卒業經史將鑑諸書智勇過

人從征新甯積寇遷指揮同知嘉靖初守備惠潮居碣石衛剿

和平賊酋李文績擇幹族十餘輩充鄉約正副構亭規勸濟族

丕變遇饑饉榜諭富室互相資濟嶺東人以全活有司媿焉庚

寅遷廣東都指揮僉事時與名公巨儒往還嘗登元覽臺雅歌

有儒將風尋克左參將分守肇高廉雷四郡建議立成岡松柏

二巡司提督林富從之未幾西徭賊黎廣趙林花攻劫府庫事

聞富與總兵仇鸞皆戴罪鑿馳師赴之駐於陽春誘招賊酋徐

二陽降因而殺之巢穴蕩平尋征連州朱砦功不得上罷歸己

亥陵崖黎岐作亂提督蔡經起鑿討之斬獲三千六百級功冠

諸哨捷聞獲賞癸巳升副總兵鎮守廣西瓊人愛之咸惜其去

後母喪歸葬卒年五十三鑒為將與廣右沈希儀齊名而文學

過之著有雪崖集

廣西通志

陳圭合肥人平江伯瑄之五世孫襲伯爵以薦出鎮兩廣封川

寇起圭討平之復平柳慶及賀連山賊加太保蔭一子又擒安

南黎岐諸賊復蔭一子圭能與士卒同甘苦深箚絕壑衝冒毒瘴無所避故所向克捷妻仇氏仇鸞之女弟圭深嫉鸞所為故鸞每短圭於世宗幾得罪鸞敗帝愈重圭命總京營兵加太子太傅卒諡武襄子王謨嗣出鎮兩廣賊張連反會提督張臬討平之加太子太保蔭一子萬歷中移鎮淮安總漕運入掌前軍府事卒贈少保諡武靖

明史陳瑄傳

國朝劉世勳廬江人原名世斗弟紹勳原名紹斗康熙十五年隨父承恩討吳三桂有功授世勳隨征副將紹勳隨征監紀同知每戰先登十八年與父承恩恢復永清等處兄弟皆卒於官

廬江縣志

鄭能合肥人明武安侯亨裔孫康熙辛丑以行伍從征臺灣攻鹿耳門恢復安平鎮又戰蘇厝申克臺灣敘功加四等雍正癸

卯大挑功臣授藍翎侍衛旋出為河南南府守備累官萊州營參將以疾乞休乾隆丙子奉

旨賜銀米追卹前功

廬州府志

王良駿字穆齋廬江人以父承業死事蔭守備康熙癸卯任蘇松鎮標左營守備升奇營城守遊擊

聖祖仁皇帝南巡

召見

賜御書吳山詩調補福建興化城守左營遊擊六十年臺賊朱一貴倡亂良駿會兵進剿入鹿耳門抵七鯤身再戰皆捷雍正六年調

陸路後營遊擊致仕歸卒

廬江縣志

董金鳳字向桐合肥人乾隆戊戌武進士第三以侍衛官河南歸德營參將乙巳夏柘邑饑民構亂金鳳往剿平之擢福建興

重修安徽通志

卷三十三

人物志

武功

三

廬州府

化營副將降洋匪翁泉等署福甯鎮總兵南澳素多盜金鳳焚其林木匪船無所匿調臺灣副將嘉義兵警金鳳剿之誅其渠魁以病卒於官蔭其子承恩通判廬州府志以上舊志張遇春字山樵巢縣武舉咸豐三年髮逆竄巢縣集團防東關旋從李鴻章攻含山七年帶勇二百餘禦捻匪大股於楊徐山裹傷擊退十年帶春字營駐祁門擊髮賊於羊棧嶺卻之同治元年從李鴻章至上海攻泗涇戰於徐家匯斬其酋二年克福山攻婁縣之楓涇又戰於西塘駐蘇州之寶帶橋裏傷平洞庭東山及吳江之同里進攻蘇州破葑門盤門賊壘三年四月傷發卒官至總兵提督銜資勇巴圖魯

贈太子少保銜世襲騎都尉兼一雲騎尉子志邦字彥侯從征江浙克復奉賢南匯青浦及湖州積功官副將署皖南鎮總兵因傷隕

歿奉

旨優卹贈總兵銜世襲騎都尉

巢縣志以下新修

劉盛瑞字子璞合肥人英毅有至性年十四攜錢隨父兄避寇道相失越三日歸饑甚納所攜錢於父問何不以貫食對曰父兄皆未必食何忍獨飽年十八隨叔父銘傳赴上海金匱之戰於重圍中翼其兄東堂以出歷克江南諸城累功授副將同治四年渡淮剿捻戰於龍渙率騎衝突賊圍衣袴皆洞穿贛榆壽光之役追賊三晝夜力戰於荏平捻逆肅清以功洊至提督加斐凌阿巴圖魯八年駐防直東卒於軍年二十六合肥縣志李昭慶字幼荃合肥人候選員外郎同治初曾國藩奏調隨營征剿疏內有沈毅英練亞於諸兄之語昭慶治軍嚴明戰守有法督援無爲州擊退髮逆從征江蘇攻克西塘楓涇等要隘擊

重刊安徽通志卷三十三
卻援賊進復嘉興四年從曾國藩剿捻匪分統湘淮諸軍兼營
務處轉戰河南湖北山東所向克捷捻蹤剽疾昭慶日夜提師
追剿繞前盪擊備歷艱辛事平

特旨簡用鹽運使八年馬新貽奏辦淮軍營務十一年引

見北上道病養疴於其兄今大學士鴻章天津行署十二年卒於天津
年三十九昭慶居家孝悌居鄉重氣誼獨力捐建其業師頴上
教諭王福永專祠勸捐修復廬州府學宮在軍廉而有恩與士
卒同甘苦不私一錢故得軍心每戰輒勝平居好學手不釋卷
著有補拙齋詩文各集採訪冊

重修安徽通志卷二百三十二

人物志

武功

鳳陽府

吳蔣欽字公奕九江壽春人從孫策東渡拜別部司馬平定三
郡又從定豫章遷西部都尉擊擒賊呂合秦狼從征合肥魏將
張遼襲權於津北力戰有功歷津右護軍典領辭訟權嘗入其
堂內母疏帳縹被妻妾布裙權歎其在貴守約初欽屯宣城燕
湖令徐盛收欽屯吏表斬之權不許由是自嫌恐欽害己而欽
每稱其善盛既服德論者美焉卒子壹封宣城侯領兵拒蜀有
功還赴南郡與魏戰臨陣卒三國志本傳

周泰字幼平九江下蔡人孫策入會稽署別部司馬策討六縣

重修安徽通志

卷三十三

人物志

武功

鳳陽府

山賊弟權住宣城山賊數千卒至權始上馬而鋒刃已交斫中馬奪眾莫能自定惟秦奮激投身衛權賊既解散身被十二創良久乃蘇是日無秦權幾危策深德之補春穀長從討黃祖有功荆州平定將兵屯岑曹操出濡須秦復赴擊遂雷督之拜平虜將軍後權欲圖蜀拜秦漢中太守奮威將軍封陵陽侯黃武中卒子邵以騎都尉領兵戰曹仁有功又從攻破曹休進位裨將

三國志本傳

丁奉字承淵廬江安豐人少驍勇從甘甯陸遜等征伐戰鬪常冠軍稍遷偏將軍孫亮卽位爲冠軍將軍封都亭侯魏遣諸葛誕胡遵攻東興諸葛恪拒之奉曰今行遲若敵據便地難與爭鋒乃帥麾下三千人揚帆徑進遂據徐塘天寒雪敵不爲備奉使兵解鎧著冑持短兵斫之大破敵前屯會諸軍俱至魏軍遂

潰遷滅寇將軍文欽來降奉迎之敗魏軍於高亭進封安豐侯

孫休卽位與張布誅孫綝遷大將軍加左右都護領徐州牧

三國志本傳

晉桓豁字朗子譙國龍亢人簡公彝之第三子溫之弟也謝萬敗於梁濮以豁督沔中七郡軍事擊慕容屈塵破之進號右將軍溫旣內鎮豁監荆揚雍三州軍事領南蠻校尉荆州刺史與竟陵太守羅崇討破趙宏趙憶於宛城又攻僞中郎將趙盤於宛追至魯陽獲之置戍而旋桓溫死遷征西將軍進督交廣太元初進大將軍上疏固讓卒贈司空諡曰敬初豁聞苻堅國中

有謠云誰謂爾堅石打碎故有子二十人皆以石爲名

晉書桓彝傳

桓祕字穆子彝第四子少有才器兄溫抑而不用久之爲宣城

內史時梁州刺史司馬勳叛入蜀祕以本官監梁益二州軍事

勳平還郡後為散騎常侍徙中領軍孝武帝初即位妖賊盧竦入宮祕與殷康俱入擊之溫入朝窮治竦事祕反免官居於宛陵每憤憤有不平之色溫死起為散騎常侍而弟沖位在其上

祕恥位卑遂表讓不應朝命先沖卒晉書桓彝傳

桓石虔小字鎮惡豁之子也趨捷絕倫從父在荆南獵圍中虎被數箭諸將戲令拔之石虔拔得一箭虎跳石虔亦跳高過於虎復拔一箭以歸從溫入關沖為苻健所圍垂沒石虔躍馬赴之拔沖於數萬眾中而還威震敵人時有犯瘡疾者必曰桓石虔以怖之討袁真走王鑿擒閻震逐張崇皆首功沖卒石虔以冠軍將軍監豫州揚州五郡軍事豫州刺史卒贈右將軍進爵作塘侯晉書桓彝傳

桓石民石虔弟也弱冠知名謝安引為參軍叔父沖表授振武

將軍領襄城太守戍夏口與石虔攻苻堅荆州刺史梁成於竟陵又與隨郡太守夏侯澄之破慕容垂姜成於漳口復領譙國內史梁郡太守沖卒詔以石民監荆州軍事苻堅子丕僭號於河北謀襲洛陽石民遣將軍馮該討之臨陣斬丕傳首京都進

左將軍卒晉書桓彝傳

齊王廣之字士林沛國相人初隨劉劭征伐合肥成阻兵為寇勳宣令求征合肥者賞以大郡廣之曰若得將軍所乘馬判能制之勳即推鞍與之合肥果拔初封蒲圻子後以功位給事冠軍將軍改封甯都縣子齊高帝廢蒼梧出廣之為徐州刺史建元元年進爵為侯武帝即位累遷右衛將軍散騎常侍前軍將軍延興元年為豫州刺史後封應城縣公卒贈車騎將軍諡曰

壯南史本傳

梁裴之高字如山壽陽人少隨叔父邃征討所在有功壽陽之
役邃卒於軍之高隸夏侯夔平壽陽除梁郡太守封都城縣男
侯景之亂之高入援及城陷退還合肥元帝召之到江陵以爲
侍中護軍將軍時之高弟之悌在侯景軍中或傳之悌斬侯景
元帝使黃羅漢報之高之高無言直云賊自殺賊非我所聞帝
深嗟其切直卒諡曰恭南史裴
邃傳
陳裴忌字無畏之高弟之平之子之平在梁亦以軍功封費縣
侯忌聰敏有識量侯景之亂招集勇力隨陳武帝征討及武帝
殺王僧辨其弟僧智據吳郡黃他攻之不能克忌勒部下自錢
塘直趨吳郡夜至城下鼓譟薄之僧智驚輕舟奔杜龕忌入據
城武帝嘉之授吳郡太守天嘉元年封東興縣侯後與吳明徹
北伐軍敗見囚於周至隋卒南史裴
邃傳

五代梁馬嗣勳濠州鍾離人朱溫攻濠州刺史張遂遣嗣勳持
牌印降之楊行密來攻遂又使嗣勳求救於溫未至而濠已沒
嗣勳無所歸乃畱事溫爲宣武軍元從押衙溫攻鳳翔至華州
使嗣勳入說韓建建卽降羅紹威欲自誅其牙軍乞助於溫溫
女嫁魏適死乃遣嗣勳以千人爲綵輿人魏致兵器於輿中聲
言助葬乃夜攻牙軍牙軍不知兵所從來莫能爲備殺之皆盡
嗣勳亦中重創卒溫卽梁位贈太保五代史
本傳

唐丁會字道隱壽春人與朱溫從黃巢爲盜溫鎮宣武以爲都
押衙李罕之以晉兵圍河陽張全義告急於梁乃遣會及葛從
周救之大敗罕之於流水又從攻魏破黎陽敗魏將羅宏信於
內黃梁攻徐州別遣會攻宿堰汴水浸東城降其刺史張筠堯
州刺史朱瑾攻單父會又敗之於金鄉然會畏溫之雄猜常稱

疾天復元年温起會為昭義節度使昭宗遇弒會率三軍縞素發喪遂降於晉晉王賜之甲第位諸將上天祐七年以疾卒莊宗即位贈太師五代史本傳

宋王惟忠鍾離人高宗初淮南盜賊蜂起惟忠據韭山壘石為城民依之者九萬餘人以孫興知濠州惟忠不從率眾歸節制

劉位為左軍統領繫年錄南舊通志

周虎字叔子臨淮人四朝聞見錄開禧二年知和州十一月戊戌金兵圍城急虎部分將士乘城拒守母何氏年九十期與虎偕亡虎益奮勵屢戰斬其驍將十二月癸丑金人引去虎推功

歸母封永國太夫人虎轉和州防禦使追諡忠惠宋史甯宗紀元杜昌濠人至正間以義兵應募有功擢汝州同知安豐等處

萬戶弟亨亦以功授泗濠義軍萬戶沒於所事江南通志鳳陽縣志

阮懷遠縣志者都萬戶扎古友子也世居荆山龔父爵守禦浙東

時盜起海上都奮力擒捕悉平之以功擢浙東道都元帥卒於

官子鞏哥兒龔勇邁英銳有父風焉江南通志懷遠縣志

明常遇春字伯仁懷遠人歸太祖於河陽請為前鋒未許及兵

薄牛渚磯距磯三丈莫能登遇春飛舸至麾之前應聲直進敵

接其戈乘勢躍上大呼跳盪元軍披靡諸將乘之遂拔采石取

太平破蠻子海牙下池州歷遷行省都督馬步水軍大元帥陳

友諒薄龍灣以五翼軍設伏大破之先是太祖所任將帥平章

邵榮右丞徐達與遇春而三榮尤善戰忽萌異志太祖欲宥其

死遇春進曰人臣以反為名臣義不與其生乃斬榮而愈愛重

遇春從伐陳友諒大戰於康郎山太祖舟膠於淺友諒驍將張

定邊直犯太祖舟遇春射中定邊乃得脫轉戰三日友諒死師

還第功最明年吳國建進平章政事復攻武昌降陳理拜副將
軍伐吳破閭門以入吳平進中書平章軍國重事封鄂國公復
拜副將軍與大將軍徐達北征入元都攻太原走擴廓帖木兒
遂拔開平元帝北走追奔數百里獲其宗王慶生及平章鼎住
等師還次柳河川暴疾卒年僅四十六太祖聞之大震悼喪至親
奠贈太保中書右丞相追封開平王諡忠武配享太廟肖像功
臣廟位皆第二子茂封鄭國公馮勝婿也洪武二十年從勝征
納哈出以不遵約束為勝所怒增飾其罪安置龍州死弟昇改
封開國公實錄不詳其事或謂從徐輝祖征燕戰死於浦子口
明史本傳
湯和字鼎臣濠人與太祖同里郭子興初起和來歸從太祖
克滁州授管軍總管時諸將多太祖等夷莫肯為下和獨奉約

束甚謹太祖悅之從擊陳瑄先降陳保二取金壇常州以和守
之大破吳軍於錫山吳平拜征南將軍與吳禎討方國珍降之
遂與廖永忠伐陳友定執友定送京師時洪武元年正月也明
年從大將軍西征斬張良臣又明年以右副將軍敗擴廓於定
西封中山侯四年拜征西將軍與廖永忠伐夏十一年進封信
國公於時帝春秋高天下無事不欲諸將典兵和從容請願得
乞骸歸故鄉帝大悅立賜鈔治第中都卒年七十追封東甌王
諡襄武和晚年益恭慎故公侯宿將多坐胡藍黨死而獨享壽
考以功名終明史本傳
沐英字文英定遠人父母俱故太祖與孝慈皇后憐之撫為子
從朱姓年十八授帳前都尉從大軍征福建破分水關別破閩
溪十八寨縛馮谷保始命復姓英年少明敏后數稱其才帝亦

重刊安海通志 卷三十三 人物志 武功 七
器重之充征西副將軍從鄧愈討吐番功多封西平侯又充征
西將軍討西番拓地數千里尋拜征南右副將軍同藍玉從傅
友德征雲南生擒元平章達里麻降右丞觀音保詔玉及友德
班師而留英守滇中入朝遣還帝親拊之曰使我高枕無南顧
憂者汝英也還鎮再敗百夷降思倫發南中悉定聞皇太子薨
哭極哀初高皇后崩哭至嘔血至是感疾卒於鎮年四十八軍
民巷哭遠夷皆爲流涕追封黔甯王諡昭靖侑享太廟子春晟
昂皆鎮雲南春字景春材武有父風英卒命嗣爵鎮雲南維摩
十一寨亂遣瞿能討平之又與何福討平阿資越州遂平初思
倫發降以爲麓川宣慰使洪武三十年爲其屬刀幹孟所逐來
奔春受上方略以兵送思倫發令別將直擣南甸大破之幹孟
乞降帝不許命春總滇黔蜀兵攻之未發而春卒以其弟晟嗣

侯建文元年比就鎮而何福已破禽刀幹孟歸思倫發亡何思
倫發死諸蠻分據其地晟討平之永樂四年大發兵討交阯拜
晟征夷左副將軍與張輔異道自雲南入共破多邦城擒僞王
黎季犛論功封黔國公卒贈定遠王諡忠敬子斌幼嗣公爵居
京師而以晟弟昂代鎮昂字景高思任發入寇擊卻之又捕斬
師宗反者卒贈定遠伯諡武襄

明史本傳

馮國用定遠人與弟勝俱喜讀書通兵法太祖略地至妙山國
用偕勝來歸甚見親信嘗從容詢天下大計國用對曰金陵帝
王之都先拔之以爲根本倡仁義收人心勿貪子女玉帛天下
不足定也太祖大悅俾居幕府典親兵委以心腹破蠻子海牙
擒陳兆先下鎮江諸郡累擢親軍都指揮使卒於軍太祖哭之
慟洪武三年追封郢國公肖像功臣廟位第八國用之卒勝已

積功爲元帥遂命襲兄職典親軍陳友諒偪龍灣戰石灰山勝
攻其中堅大破之從戰鄱陽下武昌克平江從大將軍北征下
山東諸州郡洪武元年又從征山西禽元右丞賈成左丞田保
保等帝悅詔勝居常遇春下湯和居勝下二年渡河趨陝西降
李思齊執張良臣陝西平明年復同大將軍出西安破擴廓凱
還論功封宋國公五年擴廓在和林數擾邊乃大發兵三道出
塞命勝爲征西將軍是役也大將軍軍不利李文忠殺傷相當
獨勝斬獲甚眾全師而還久之徐達李文忠皆卒而元太尉納
哈出屯金山數爲遼東邊害二十年命勝爲大將軍征之降其
所部二十餘萬眾帝大悅二十五年皇太孫立加太子太師練
軍山西時詔列勳臣望重者八人勝居第三帝春秋高勝數以
細故失帝意藍玉死詔還京踰二年賜死諸子皆不得嗣而國

用子誠積戰功雲南累官至右軍左都督

明史馮勝傳

傅友德宿州人初從明玉珍又從陳友諒皆不能用太祖攻江
州至小孤山友德來歸帝與語奇之用爲將戰鄱陽被數創戰
益力友諒死從征武昌城東南高冠山下瞰城中漢兵據之諸
將莫敢前友德一鼓奪之武昌平授雄武衛指揮使從北征敗
元丞相也速復從攻陝西以五十騎擊卻擴廓萬眾洪武三年
從大將軍大敗擴廓移兵伐蜀克漢中論功封潁川侯明年統
前將軍與湯和分道伐蜀明昇降帝自製平西蜀文盛稱友德
功第一又征沙漠從出塞進封潁國公討平雲南叛蠻加太子
太師二十五年出練軍山西明年召還又明年賜死嘉靖元年

雲南巡撫何夢春請立祠祀名曰報功

明史本傳

吳良定遠人初名國興賜名良與弟禎從太祖起濠梁並爲帳

前先鋒良能沒水偵探禎每易服爲閒諜從克江陰以良爲指揮使守之張士誠據兵江陰當其要衝士誠來寇艤艦蔽江良遣弟禎出北門與戰而潛遣元帥王子明馳出南門合擊大敗之時太祖數自將爭江楚上流與友諒角金陵空虛士誠不敢北出爭尺寸地以良在江陰爲屏蔽也良訓將練兵常如寇至暇則延儒講論新學宮開屯田在境十年封疆晏如吳平移鎮蘇州洪武三年進都督同知封江陰侯五年副鄧愈平廣西叛蠻十二年齊王封青州妃良女也命良往建王府遂卒於青贈江國公諡襄烈子高嗣禎初名國寶賜名禎積功爲天興翼副元帥助良守江陰從圍平江破葑胥二門尋副湯和討方國珍追及盤嶼降之洪武元年進兵破延平擒陳友定三年命爲靖海將軍練軍海上封靖海侯七年充總兵官捕倭至琉球大洋

海上數年無寇十一年奉詔出定遼得疾輿還京師卒追封海

國公諡襄毅與良俱肖像功臣廟子忠嗣

明史本傳

康茂才字壽卿蘄人事母孝元末寇亂結義兵保鄉里太祖渡江家屬畱和州時茂才移戍采石扼江渡爲常遇春所破久之始降太祖釋之命爲將以功歷帳前總制親兵左副指揮使陳友諒旣陷太平謀約張士誠合攻應天太祖知茂才與之有舊命遣使持書給爲內應友諒問康公安在答曰守江東木橋使還太祖易之以石友諒至見橋愕然連呼老康不應退至龍灣伏兵四起大破之從征友諒援南昌戰彭蠡征武昌下平江皆有功歷遷同知大都督府事洪武元年從大將軍經略中原畱守陝州善於撫綏民立石頌德復從大將軍征定西軍還道卒追封蘄國公諡武康子鐸以父功封蘄春侯督民墾田鳳陽帥

兵平辰州蠻從北征又從征雲南卒於軍追封蘄國公諡忠愍

明史本傳

丁德興定遠人太祖偉其狀貌呼為黑丁從取洪山寨以百騎破賊數千自是累戰有功授鳳翔衛指揮使圍平江卒於軍洪武元年追封濟國公祀功臣廟子忠龍江衛指揮使予世襲

明史本傳

郭興一名子興濠人滁陽王郭子興據濠興隸麾下太祖在甥館興歸心焉從圍常州晝夜不解甲者七月城下受上賞戰鄱陽建策火攻征武昌圍平江有功吳平擢鎮國將軍大都督府僉事洪武元年從取中原守潼關敗元王左丞移鎮鞏昌封鞏昌侯十六年巡北邊召還踰年卒贈陝國公諡武宣

明史本傳

郭英興之弟也太祖親信之令值宿帳中呼為郭四從征武昌

陳氏驍將陳同僉持槩突入太祖呼英殺之衣以戰袍從定中原又從攻太原歷河南都指揮使僉事洪武十四年從征雲南十六年復征雲南論功封武定侯二十年遣還鄉明年召還典禁兵永樂元年卒贈營國公諡威襄元孫勛桀黠有智數大禮議起勛知上意首右張璉世宗大愛幸之請以英侑享太廟廷臣持不可帝不聽英竟得侑享

明史本傳

耿炳文濠人父君用從渡江為管軍總管援宜興與張士誠兵爭柵力戰死炳文襲職領其軍取廣德進攻長興克之長興據太湖口陸通廣德與宣歙接壤為江浙門戶太祖大喜改為長安州立永興翼元帥府以炳文為總兵都元帥守之又改為永興衛親軍指揮使司長興為士誠必爭地炳文拒守凡十年以寡禦眾大小數十戰戰無不勝士誠迄不得逞吳平進大都督

府僉事洪武三年封長興侯至末年公侯且盡而炳文以元功宿將朝廷倚重建文元年燕兵起以炳文為大將軍北伐為燕所敗召歸燕稱帝之明年自殺子濬永樂初杜門稱疾坐罪死

明史本傳

按明史紀事本末言炳文歿於陣嘉定錢大昕作養新錄亦言劉三吾為炳文墓碑歿於陣與史異存之以備考

華雲龍定遠人聚眾居韭山太祖起兵來歸與諸將同功歷豹韜衛指揮使從克淮安使守之改淮安衛指揮使從北征克元都擢大都督府僉事總六衛兵畱守兼北平行省參知政事洪武三年論功封淮安侯上言北平邊塞東自永平薊州西至灰嶺下隘口一百二十一相去二千二百里其王平口至官坐嶺隘口九相去五百餘里俱衝要宜設兵紫荆關及蘆花山嶺尤

要害宜設千戶守禦所從之建燕邸增築北平城皆其經畫召

還道卒子中襲

明史本傳

張龍濠人從太祖渡江以功擢威武衛指揮僉事從平山東河南克潼關為副畱守洪武三年調守鳳翔改鳳翔衛指揮大敗賀宗哲進克鳳州封鳳翔侯子麟尚福清公主授駙馬都尉

明史本傳

胡海字海洋定遠人來歸從征敗元將賈魯海驍勇屢戰屢傷手足胸腹開金瘡皆徧而戰益力太祖壯之從沐英征雲南海以夜四鼓渡河繞點蒼山後攀大樹緣崖而上立旗幟英士卒望見皆踊躍大呼遂斬關入論功封東川侯

明史本傳

張赫臨淮人以義兵來歸屢戰有功洪武元年歷遷福州都指揮使倭寇出沒海島沿海居民苦其剽掠赫所捕獲不可勝計

最後追至琉球大洋擒其魁十八人獲倭船十艘會遼東漕運

艱軍食失期命督海運封航海侯病卒追封思國公諡莊簡子

榮從征雲南有功為水軍右衛指揮使明史本傳

張銓定遠人以功為指揮僉事從周德興征五溪蠻平之從征

雲南功最多封永定侯世襲指揮使明史本傳

顧時字時舉濠人從渡江功多歷大都督府副使從大將軍定

河南北浚牖以通舟師自臨清至通州下元都徐達還京命時

將騎兵下靜甯州走賀宗哲西邊悉平封濟甯侯卒葬鍾山追

封滕國公諡襄靖附祭功臣廟子敬嗣侯以左副將軍平龍泉

山寇有功明史本傳

陳德字至善濠人戰鄱陽太祖舟膠於淺德身被九矢力戰不

退北征克汴梁立河南行都督府以德署府事征山西至秦州

追擒元守將呂國公又破擴廓於古城降其卒八萬封臨江侯

卒追封杞國公諡定襄子鏞襲明史本傳

王志臨淮人以功歷親軍衛指揮使改六安衛守六安封六安

侯用兵西南皆以偏將軍從雖無首功然持重未嘗敗嗣卒追

封許國公諡襄簡子威嗣明史本傳

唐勝宗濠人太祖起兵勝宗年十八來歸從渡江戰功同諸將

洪武三年封延安侯十四年浙東山寇葉丁香作亂命總兵討

之擒其首併其黨三千餘人分兵平安福賊至臨安降元右丞

兀卜台等十五年巡視陝西督屯田簡軍士明年鎮遼東在鎮

七年威信大著後坐胡惟庸黨死明史本傳

陸仲亨濠人從太祖渡江功同諸將封吉安侯後坐胡惟庸黨

死仲亨年十七從征至封侯帝嘗曰此我初起時腹心股肱也

竟坐誅

明史本傳

鄭遇春濠人遇霖之弟也遇霖戰死遇春領其眾從平陳友諒身先士卒未嘗自言功太祖異之取六安爲六安衛指揮僉事從定山東河南克朔州改朔州衛指揮副使洪武三年封滎陽侯明年命駐臨濠開行大都督府坐累奪爵尋復之二十三年坐胡黨死

明史本傳

周德興濠人與太祖同里少相得從渡江歷位至湖廣行省左丞同楊璟討廣西攻永州敗元平章阿思蘭及周文貴斬朱院判追奔至全州遂克之廣西平功多洪武三年封江夏侯以平蠻將軍討平慈利土酋覃厚長沙洞蠻等明年伐蜀副湯和爲征西左將軍克保甯蜀平論功帝以和功由德興且追數覃厚之役無與德興比者復副都僉爲征南左將軍出南甯平婪鳳

安田諸蠻功復出諸將上命署中立府行大都督府事五溪蠻亂德興已老力請行帝壯而遣之至則蠻悉散走德興在楚久威震諸蠻決荆山嶽山壩以溉田歲增官租四千三百石楚人德之還鄉居無何帝謂德興福建功未竟卿雖老尙勉爲朕行德興至閩相視要害築城十六置巡司四十有五防海之策始備後坐其子驥有罪死

明史本傳

王弼定遠人徙居臨淮初依三臺山樹柵保鄉里帥所部來歸戰比有功從圍平江士誠親率銳士出西門搏戰奔常遇春軍遇春拊弼背曰爾稱健將能爲我取此乎卽馳騎揮雙刀出遇春乘之吳兵大敗士誠墮水幾不救自是不敢復出吳平賞賚甚厚洪武三年授大都督府僉事十一年副沐英征西番功多封定遠侯十四年從傅友德征雲南擒土酋段世又從馮勝降

納哈出從藍玉走元嗣主脫古思帖木兒後坐藍黨死明史本傳
 藍玉定遠人初隸常遇春帳下遇春素稱之由管軍鎮撫積功
 至大都督府僉事洪武四年從伐蜀五年從北征十一年討西
 番並有功師還封永昌侯十四年以征南右副將軍從傅友德
 征雲南擒元平章達里麻梁王走死滇地悉平玉功為多二十
 年以左副將軍從馮勝征納哈出乘大雪率輕騎襲慶州殺平
 章果來擒其子不蘭溪受納哈出之降馮勝有罪代為大將軍
 移屯薊州二十一年出大甯至慶州諜知元主在捕魚兒海兼
 程進去海四十里不見敵欲引還王弼不可遂乘夜至海南知
 敵營尚在海東北八十里疾馳薄其營會大風揚沙敵無所覺
 猝至前大驚迎戰敗之殺太尉蠻子等元主與太子天保奴遜
 去獲其次子地保奴妃公主以下百餘人奏捷京師帝大喜賜

敕褒勞比之衛青李靖師還進涼國公二十六年指揮蔣瓛告

王謀反族誅公侯以下坐夷滅者至萬五千人於是元功宿將

相繼盡矣明史本傳

曹震濠人以征西番功封景川侯永甯宣慰司言所轄地有百

九十灘其八十灘道梗不通詔震疏治之震鑿石削崖令深廣

以通漕運在蜀久規畫周詳蜀人德之藍玉敗論其黨以震為

首並其子炳誅之又張翼臨淮人父聚從平江南淮東以功為

大同衛指揮同知致仕翼嗣父職以功封鶴慶侯又陳桓濠人

以功封普定侯皆坐藍黨死明史藍玉傳

謝成濠人以功封永平侯坐事死明史本傳

李新濠人從太祖渡江數有功累遷至中軍都督僉事洪武十

五年以營孝陵功封嵩山侯二十二年命改建帝王廟於雞鳴

山新有心計將作官吏視成畫而已二十六年督有司開臙脂河於溧水西達大江東通兩浙以濟漕運河成民並便之二十八年坐事死

明史本傳

吳幹臣定遠人太祖伐張士誠以指揮使從大將軍徐達率馬步舟師由港口取湖州幹臣勒奇兵出舊館扼之戰大捷事平遂畱戍馬時方國珍據明州未下以爲征南副將軍從御史大夫湯和往平之洪武元年海寇葉陳二姓聚劫蘭秀山幹臣調兵立剿之三年封靖海侯

浙江通志新增

繆大亨定遠人初糾義兵爲元攻濠元兵潰大亨與張知院屯橫湖山固守太祖夜襲其營破之比明復陣以待太祖遣其叔貞諭降之從征有功擢元帥總兵取揚州克之降青州元帥張明鑑遷同僉樞密院事總制揚州鎮江大亨有治略寬厚不擾

民甚悅之未幾卒太祖過鎮江歎曰繆將軍生平端直未嘗有

過今不見矣遣使祭其墓

明史本傳

武德安豐人

潁州府志云霍邱人

元末爲義兵千戶知元將亡來歸隸李

文忠從戰池州矢中右股戰自若又敗苗帥楊完者每陷陣受傷不顧文忠歎曰將士人人如此何戰不捷進管軍千戶世襲

明史繆大亨傳

孫恪濠人燕山侯興祖之子也從藍玉北征以功封金陵侯恪

謹敏有儒將風亦以藍黨死

明史孫興祖傳

甯正字正卿壽州人幼爲韋德成養子隨德成來歸德成戰歿於宣州以正領其眾積功爲鳳翔衛指揮副使洪武三年授河州衛指揮使正初至衛城邑空虛勤於勞來不數年遂爲樂土始復甯姓兼領甯夏衛事修築漢唐舊渠引河漑田開屯數萬

頃十三年從沐英北征取金甯四部雲南思倫發亂正破之於
摩沙勒寨已復從沐英分兵三隊正將左大敗之英卒詔為左
都督代鎮已復命總川陝兵討平階文叛寇張者二十九年卒

明史本傳

謝彥鳳陽人數從征討有功累官前軍都督僉事子達尙太祖

女汝陽公主明史公主傳

潘毅臨淮人洪武初以戰功授虎賁衛指揮使再從西征道卒

江南通志

孫岳鳳陽人洪武初以勳舊任雷州衛鎮撫從學趙考古機謀
智勇而廉靜有守始終如一疆宇初闢疊著先登功遠近懾其

威名廣東通志新增

何福鳳陽人洪武初累功為金吾後衛指揮同知二十二年討

平都勻蠻二十四年破降越州叛蠻遂平九名九姓畢節諸蠻
三十年從沐春討麓川刀幹孟春福破擒之麓川悉定建文
元年還京師論功進都督同知與平安盛庸會兵伐燕不利成
祖卽位推誠用之充總兵官鎮甯夏節制山陝河南諸軍四年
移鎮甘肅七年降迤北王子國公司徒以下十餘人福親至亦
集乃撫之送其酋長於京師封甯遠侯後陳瑛劾其罪自縊死

明史本傳

朱能字士宏懷遠人父亮從渡江以功至燕山護衛副千戶能
嗣職事燕邸嘗從北征降元太尉朵兒不花燕師起有大功封
成國公永樂二年兼太子太傅四年以征夷將軍討安南卒於
軍追封東平王諡武烈洪熙時配享成祖廟庭子勇嗣明史本傳
張恕鳳陽人洪武初由父勳任山西護衛揮僉升同知調海南

衛敦篤謙和涉獵子史永樂五年征潯州等處十六年督築南

山新城皆有功時有定遠楊義亦以父勳襲河南衛指揮同知

升揮使亦調海南衛多才有守軍民畏愛廣東通志 新增

宋晟定遠人朝用次子國興之弟國興戰歿朝用請老晟襲父

官累進都指揮同知歷鎮江西大同陝西洪武十七年討西番

叛酋俘獲萬八千人二十四年討哈梅里收其部落輜重以歸

番戎懽服建文改元鎮甘肅永樂初入朝封西甯侯凡四鎮涼

州前後二十餘年威信著於絕域明史本傳

陳懋壽州人父亨建文時為都督僉事燕師起與劉真卜萬守

大甯以計囚萬因襲真而降燕旋為燕與平安戰鐔山受重創

輿還而死燕王自為文祭之即位後追封涇國公諡襄敏長子

恭嗣都督同知懋其少子也永樂元年封甯陽伯六年鎮甯夏

明年降故元丞相督卜及平章司徒國公知院十餘人已而不

章都連等叛去懋追擒之黑山八年十一年二十年皆從北征

明年從征阿魯台為前鋒又明年復領前鋒從北征上崩於榆

木川仁宗召懋與薛祿帥精騎三千馳歸衛京師命掌前府加

太保與世侯卒贈濬國公諡武靖明史陳亨傳

孫巖鳳陽人官燕山中護衛千戶永樂初以功封應城伯卒贈

侯諡威武又陳賢壽州人歷燕山右護衛指揮僉事燕師起從

諸將轉戰常突陣陷堅軍中稱其驍勇論功封榮昌伯張興壽

州人為燕山左護衛指揮僉事從起兵功多累遷都指揮同知

封安鄉伯明史本傳

李彬字質文鳳陽人父信從太祖渡江積功為濟川衛指揮僉

事彬嗣職從傅友德出塞築諸邊城燕師起彬迎降永樂元年

封豐城侯四年充總兵官備倭海上移師擒長沙賊李法良十年命往甘肅與宋琥經略降酋明年代琥鎮甘肅縛涼州叛酋老的罕以獻賜賚甚厚十五年鎮交趾時交趾人反者四起彬遣諸將分道往討而尤劇者輒自將往擊諸賊略平惟黎利數出沒磊江將發兵入老撾索之會疾作罷明年卒贈茂國公諡剛毅子賢嗣宣德三年從出塞正統初鎮大同尋守備南京卒贈豐國公諡忠憲

明史本傳

費瓛定遠人祖愚為燕山中衛指揮使傳子肅至瓛從燕起兵累進後軍都督僉事永樂八年擊涼州衛叛人虎保永昌衛叛人亦令真巴等追奔至北魚海斬獲無算十二年充總兵官鎮甘肅宣宗嗣位封崇信伯征高煦有功復鎮甘肅卒於鎮子釗

明史本傳

李達定遠人以功官都督僉事鎮洮州至四十餘年蕃漢畏服

正統中致仕

明史本傳

郭登字元登濠人武定侯英孫也正統中從王驥征麓川有功又從沐斌征騰衝歷署都指揮僉事十四年扈從北征至大同拜都督僉事佐劉安鎮守朱勇等軍覆登告曹鼐張益曰車駕宜入紫荆關王振不從遂及於敗是時人心洶洶登慷慨登陴誓與城共存亡景帝監國代安為總兵官景泰元年偵知寇自順聖川入以八百人躡之大破其眾軍氣一振封定襄伯初也先欲取大同為巢穴故數來攻及每至輒敗始有還上皇意二年以疾召還成化八年卒贈侯諡忠武登事母孝居喪秉禮能詩明世武臣無及者

明史本傳

鄧安定遠人官福州都指揮僉事鄧茂七攻劫郡邑民多避地

入城羣不逞者乘機為姦安捕殺首惡嚴守禦以備之一方遂

安福建通志

顧斌懷遠人世襲漳州衛指揮僉事鄧茂七黨楊福率眾鬪漳以雲梯攻城勢危甚斌時督兵備倭海上夜率五百人航海來援突圍入城募死士迎戰斌躍馬大呼以百騎直壓賊壘麾死士為兩翼以巨斧砍之賊大敗去明日復益兵來攻又破逆賊遂遷擢都指揮僉事福建通志

官顯壽州人任福建建甯衛指揮僉事正統十四年沙尤寇攻將樂城顯設備俟賊少懈襲破之升指揮同知子鎧嗣任歷遷邵武衛同知福建通志

李春鳳陽人正統間為邵武巡檢沙寇突至城南親冒矢石為士卒先連射皆中賊驚遁後累有提兵討賊功福建通志

趙輔字良佐鳳陽人襲職為濟甯衛指揮使成化元年以征夷

將軍與韓雍討兩廣克大藤峽還封武靖伯三年總兵征迤東

從撫順深入有功進侯卒贈容國公諡恭肅子承慶嗣伯明史本傳

戚繼光字元敬定遠人世襲登州衛指揮僉事父景通官都指

揮入為神機坐營繼光襲職用薦署都指揮僉事以參將備倭

浙東練金華義烏兵因地形製陣法太破倭於台州以副總兵

鎮福建大破倭於平海衛復興化塵同安殲餘賊於漳浦閩寇

悉平召為神機營副將以都督同知總理薊州昌平保定三鎮

升總兵築牆堡立車營東西邊二寇土蠻長昂不敢入犯進左

都督加秩少保移鎮南粵踰二年得請還登州卒諡武毅明史本傳

定遠縣志

神英字景賢壽州人天順初為延安衛指揮使從都督張欽征

討有功成化間以征滿四功遷都指揮使進參將屢敗亂加思

蘭兵進都督僉事充總兵官鎮守甯夏後封涇陽伯明史本傳

趙榮定遠人成化間任福建北路烽火寨欽依把總屢平劇盜

有渠魁口銜刀左右手各執一刀飛侵榮舟榮迎砍之遂入賊

舟擒斬殆盡自是海寇膽落福建通志新增

戴紹印鳳陽人自萬戶侯擢三江總戎致仕萬曆丁酉日本關

白犯朝鮮命兵部尚書邢玠總督征之紹印杖策從畫平倭十

策卒覆倭以過勞驟卒巡撫褚鐵檄郡建祠江南通志

沈思學宿州人嘉靖甲寅流寇師尚詔圍城思學單騎突入賊

營潰圍而出賊驚遁以勇薦舉備倭通泰之戰賊乘風進巡撫

李燧明史作遂擢甲誓死思學揮戈直前遂平倭升狼山鎮總兵都

督僉事宿州志

國朝宋元俊字甸芳懷遠人以武進士歷四川阜和營遊擊乾隆

三十六年金川酋索諾木襲殺革布土司其黨小金川酋亦發

兵侵明正土司據班爛山總督阿爾泰命元俊責賊問故索諾

木詭以革番內變為辭元俊知其詐歸告曰爾酋犄角為姦非

大創不可即獻進兵之策奏聞

上命副將軍溫福提督董天弼分路進兵總督阿爾泰居中控制密令

參將薛綜挾巴魯擊山梁而元俊從甲楚渡河攻之賊腹背受

敵大驚奔潰遂破甲金達收復班爛山擢松潘總兵進討金川

率遊擊吳錦江等由節木郭渡河據勺藏橋而密使革布番民

約結內應舉礮為號同時夾攻擊斬千餘人進圍丹東角洛收

復革境三百餘里以兵少持重不肯輕進為制府劾革職卒於

軍籍其家二子戍邊有張芝者為麾下參將四十一年大將軍

阿桂平定金川芝書元俊戰狀哭軍門將軍奏聞蒙

恩赦其子歸袁枚小倉山房集 懷遠縣志

王大壯字烈文懷遠人以武進士發浙江候補守備捕獲濱海盜賊無算以薦遷嘉順營都司乾隆三十六年征兩金川松潘鎮總兵宋元俊薦其才可用題署建昌中營遊擊權總兵事建昌東接涼山諸蠻時出剽掠漢民童穉為奴婢漢民犯罪者逃入則匿之會長安士依陸世采尤凶狡不法以縣役奪蠻物擁眾屯城東大壯自往撫諭挺刀厲至大壯叱之皆辟易不敢動遂縛兩酋以歸將斬之其頭人十四酋捧香為乞命大壯設軍容召之跪階下數其罪與之約曰能遵貫罪皆感泣聽命乃杖二酋而遣之立反童穉逃數百人一境歡呼金川凱旋授貴州撫標右營遊擊四十六年四川囑嚕嘯聚侵軼及滇境巡

撫檄大壯以兵二百往援之疾馳至遵義即大呼馳之賊披靡得入城見官兵少明日復合圍大壯誘之前發所自製滾地神雷火器擊之大敗之賊夜逃窮追至蜀之合江縣復殺數百人遷朗洞營參將丁母憂歸哀毀成疾未畢喪而卒姚鼐補川志稿 懷遠縣志

徐大鵬靈璧人乾隆庚寅武解元成戊戌進士授廣東羅定協右營守備從征臺灣擒賊匪莊大田旋以從征安南功補督標中營都司嘉慶元年進剿湖南苗匪升廣西右江遊擊以疾歸七年病痊領鄉勇堵剿宿州逆匪王朝名復起用蒙

恩賞戴花翎補易州營遊擊署河間協副將舊志

賈魴字靈淵壽州人自行伍擢鳳臺縣把總擒劇盜遷無為州千總又以獲潁州姦民程八等十三人功升陝西興安營守備

時白蓮逆匪倡亂連楚蜀秦豫之境鮐隨提督帶兵敗賊於四
川麻柳壩刺朋溝西安距興安七百餘里賊首張漢潮擁數萬
人出沒鎮安山陽間鮐轉餉十餘萬漸近賊砦夜聞軍聲如潮
火光迸起眾恐懼欲逃鮐按劍呼曰死耳會得驛遞人於草間
知有僻徑遂達興安以勤攝白土關都司奉檄守五塊石江口
江淺可涉賊每夜至鮐以巨礮擊之賊不敢渡沿漢屯兵數萬
餉不時至卒有饑色日夜撫循眾感而不怨竟以勞染疫卒於

軍壽州志
以上舊志

秦攀萼字棣堂宿州人嘉慶七年由武生從征教匪王潮名拔
補把總隸兩江督標疊次緝獲海盜鹽梟及剿滅刁李二圍賊
穴歷升河標副將以總兵用署狼山鎮捐修掘港一帶海口礮
臺調徐州鎮獲糧船巨匪正法積勞病卒宿州志
以下新修

康錦文懷遠人歷從袁甲三僧格林沁轉戰皖豫東楚屢著勞
積官至總兵加提督銜同治五年帶兵防潁州沙河北岸舟覆
而死奉

旨優卹祀昭忠祠懷遠縣志

張佩芝壽州人歷剿髮捻有功又帶勇攻克湖北黃陂縣轉戰
山東安邱濰縣等處累保總兵勇號同治十二年在營傷發病
故奏請

旌卹李鴻章奏案

潁州府

魏曹仁字子孝沛國譙人操從弟也祖褒潁川太守父熾侍中
長水校尉漢末豪傑並起仁從操為別部司馬破袁術攻陶謙
擒呂布平黃巾迎天子都許皆有功拜廣陽太守不之郡以議

郎督騎封都亭侯從平荊州行征南將軍留屯江陵吳將周瑜來攻仁使牛金挑戰為所圍仁自將數十騎救之乃得解眾服其勇轉封安平亭侯少不修行檢及長為將嚴整奉法令鄢陵侯彰北征烏丸文帝時在東宮以書戒之曰為將不當如征南耶後進封陳侯卒諡曰忠子泰嗣三國志本傳

曹純字子和仁之弟也好學愛士為遠近所稱初以議郎參司空軍事督虎豹騎從圍袁譚於南皮士卒多死欲議緩之純不可遂急攻之斬袁譚及北征三郡純部騎獲單于踰頓以功封高陵亭侯建安十五年卒追諡威侯英雄記三國志曹仁傳

曹洪字子廉操初起義兵討董卓為徐榮所敗失馬追甚急洪以己馬授之曰天下可無洪不可無公遂步從到汴水循水得船還奔譙及天子都許封明亭侯文帝即位累封徙都陽侯洪

富而性吝文帝少時假求不稱恨之遂以舍客犯法下獄當死羣臣莫能救下太后怒曰梁沛之間非子廉無有今日乃得釋

後更封樂城侯卒諡曰恭子馥嗣魏略三國志本傳

曹休字文烈操族子少孤年十餘歲將母至吳聞義兵起聞行北歸操見之謂左右曰此吾家千里駒也常從征伐領虎豹騎

宿衛文帝即位封東陽亭侯擊破吳將於歷陽領揚州刺史進安陽鄉侯又擊吳大將呂範於洞浦破之拜揚州牧明帝即位進封長平侯擊斬吳將審意於皖遷大司馬太和二年征吳為

吳所誘深入敗還癰發背卒諡曰壯子肇嗣三國志本傳曹真字子丹操之族子父邵從起兵為州郡所殺憐其少孤收養與諸子同文帝即位封東鄉侯張進等反於酒泉真使費耀擊斬之黃初三年以真為大將軍敗吳軍於牛渚蜀降南安天

水安定三郡真復之遷大司馬卒諡曰元子爽嗣為司馬懿所

殺三國志本傳

曹彰字子文文帝母弟數從征伐志意慷慨封鄴陵侯建安二十三年代郡烏丸反以彰為北中郎將行驍騎將軍北征入涿郡界兵馬未集敵數千騎卒至用田豫計固守俟其退散身自搏戰乘勢逐北至於桑乾去代二百餘里諸將皆以為士馬疲頓不可深進彰不可遂上馬令後出者斬一日一夜與敵相及大破之黃初二年進爵為公三年立為任城王四年朝京師卒於邸諡曰威子楷嗣

三國志本傳

夏侯淵字妙才沛國譙人曹操初起以別部司馬騎都尉從遷陳畱潁川太守屢從征伐破袁紹擊韓遂所向有功封博昌亭侯枹罕宋建因涼州亂自號河首平漢王淵率諸將討之月餘

遂拔枹罕斬建操下令曰宋建亂逆三十餘年淵一舉滅之虎

步關右所向無前仲尼有言吾與爾弗如也西征張魯漢中平

畱淵守之先主軍陽平關淵拒之為所襲戰死諡曰愍

三國志本傳

許褚字仲康譙人勇力絕人嘗以一手逆曳牛尾行百餘步淮

汝陳梁圃皆畏憚之以眾來歸操一見壯之曰此吾之樊噲也

即日拜都尉從討韓遂馬超以潼關兵盡渡河操獨與褚畱南

岸斷後超兵大至褚扶操上船左手舉輦蔽矢右手挾櫓泝船

僅乃得濟是日微褚幾殆後與遂超會語超負其力欲前突疑

從者為褚因問曰聞軍中有虎侯今安在操顧指褚褚瞋目視

之超不敢動軍中號曰虎癡文帝即位遷萬歲亭侯明帝時進

牟鄉侯卒諡曰壯

三國志本傳

吳呂據字世議汝南細陽人大司馬範之子也為安軍中郎將

數討山賊諸深惡劇地所擊皆破歷位至右將軍魏出東興據戰有功五鳳二年破魏將曹珍於高亭太平元年帥師侵魏未及淮聞孫峻死以從弟綝白代據大怒引軍還欲廢綝綝聞之使中書奉詔詔文欽等取據左右勸據降魏據曰恥為叛臣遂自殺三國志呂範傳

陳任忠汝陰人侯景之亂隨晉熙太守梅伯龍討景將王貴於壽春每戰卻敵梁亡入陳屢有功太建五年北伐忠出西道擊走齊歷陽王高景安於大岷襲合肥克霍州十二年生擒周將王延貴加封信都郡公隋兵濟江陳亡入隋卒陳書本傳

唐江子建信州人隋末兵起所在殘破子建設柵禦賊鄉井獲安武德初以其保護功即命為本州刺史江南通志按唐武德四年始以汝陰郡置信州六年即廢仍名潁州子

建既不得云信州人又不當云武德初為信州刺史也未知所據

王敬蕘潁州汝陰人事州為牙將唐末王仙芝攻劫汝潁間刺史不能拒敬蕘遂代之即拜刺史沈勇有力善用鐵鎗潁數為秦宗權所攻力戰拒之河南諸州悉陷獨潁不可下傍近州民皆依以避賊朱溫攻淮南過潁敬蕘供饋甚厚溫喜表為沿淮指揮使後梁攻吳龐師古死清口敗兵過潁值大雪敬蕘沿淮置薪作糜粥舖之多所全活溫表為武甯軍留後遂拜節度使溫篡唐敬蕘以疾致仕卒於家五代史本傳

按五代史入敬蕘於雜傳敬蕘未為梁官猶唐臣也故仍附之於唐

五代梁張存敬譙人少事朱溫為將溫攻徐兗以存敬為行營

都指揮使攻滄州敗劉仁恭於老鴟隄還攻王鎔於鎮州遷宋州刺史復從攻幽州取瀛漠祁景四州攻定州大敗王處直於懷德又攻河中降王可溫表為護國軍留後卒贈太傅五代史本傳

徐懷玉亳州雋夷人少事朱溫以雄豪自任為永城鎮將秦宗

權攻梁壁金隄靈昌酸棗懷玉以輕騎連擊破之又破之於板

橋赤岡拔其八柵從破徐宿金創被體戰必克捷所得賞賚以

分士卒為時名將又從攻兗破朱瑾於金鄉從攻楊行密龐師

古敗清口懷玉一軍獨完遷沂州刺史天復四年以兵迎昭宗

都洛陽遷華州觀察留後又敗晉於洪洞拜保大軍節度使本

名琮溫賜名懷玉後朱友謙附於晉襲懷玉殺之五代史本傳

楊師厚潁州斤溝人從李罕之歸晉無所知奔於梁朱溫以為

宣武軍押衙曹州刺史攻王師範破趙匡凝功多拜山南東道

節度使同中書門下平章事又克劉知俊於長安敗周德威於

蒙阮遷保義軍節度使徙鎮宣義溫遇殺友珪自立以師厚為

天雄軍節度使已而與友貞同謀討友珪殺之友貞立封師厚

鄴王瘍發卒五代史本傳

宋田欽祚潁州汝陰人仕周為供奉官宋初遷閣門通事舍人

蜀平後土寇亂遣欽祚討平之并人寇樂平以所部破寇擒副

將一人遷西上閣門使又破賊兵牙石嶺關領賀州刺史朝廷

議征江表遣欽祚覘之還奏合旨師興首命欽祚與曹彬李漢

瓊率騎軍先赴江陵就命為昇州西南路行營馬軍兼左廂戰

權都監敗吳軍於溧水斬其帥李雄等五人擒裨將二人南唐

平以功加汾州防禦使太平興國初為晉州都鈐轄敗太原驍

將楊業於洪洞四年從征太原護前鋒騎屯石嶺關以扞契丹

病卒

宋史本傳

丁罕潁州人應募補衛士累遷指揮使從劉廷翰戰徐河以奪橋功遷本軍都虞候淳化三年出爲澤州團練使知霸州會河溢壞城壘罕以私錢募築民咸德之五年爲容州觀察使敗李繼遷俘獲萬計拜密州觀察使知威虜軍徙貝州卒子守德能

世其家

宋史薛超傳

高瓊亳州蒙城人嘗有罪逃事王審琦太宗尹京邑知其材勇召置帳下後卽位擢御龍直指揮使出爲許州馬步軍都指揮使會有龍騎亡命卒數十人因知州臧丙出郊謀劫其導從以叛瓊聞卽單騎追捕至榆林村賊首青狐狼者注弩將射瓊瓊一發斃之悉擒送州丙上其事召還積功爲保大軍節度眞宗卽位加彰信軍節度景德元年契丹內侵寇準請親征帝幸澶

州及至南城眾請駐蹕準力爭不能決出遇瓊於屏謂曰太尉受國恩今日有以報乎瓊對曰願效死卽入奏曰敵師已老陛下宜親往以督其成卽麾衛士進輦帝遂渡河御北門城樓遠近望見御蓋踴躍歡呼聲聞數十里契丹相視驚愕不能成列乃請盟是役也準之功而得瓊之力爲大未幾以久疾解兵柄授檢校太尉忠武軍節度卒年七十二贈侍中瓊不識字善訓諸子繼勳繼宣最知名

宋史本傳參用寇準傳

高繼勳字紹先瓊之子咸平中王均據益州以繼勳爲益州兵馬都監招安使雷有終授之兵五百使守東郭二門會賊攻彌牟砦繼勳轉鬪至嘉州敗之日暮更戰創血濡甲馬死再更以進均遂破滅以功遷崇義使徙鎮岢嵐軍契丹聚兵五萬屯草城川繼勳登高望之曰眾而不整將不才也乃大敗之於寒光

嶺領榮州刺史後為昭信軍節度使以老病乞骸骨卒年七十
入贈太尉子遵甫嘉祐八年女正位皇后神宗即位冊皇太后
累贈繼勳太師尚書令追封康王諡武穆遵甫亦贈太師尚書
令兼中書令追封楚王宋史高瓊傳
高繼宣字舜舉繼勳之弟也以恩補西頭供奉官遷邠州兵馬
都監曹瑋守邠數與言兵薦其可用乾興初為益州都監蜀人
富侈元夕張燈知府薛奎戒以備盜繼宣籍惡少年飲犒之使
潛識盜背明日盡獲之歷遷恩州團練使知并州元昊寇麟府
繼宣帥兵抵天門關是夕大雨及河師半濟黑凌暴合舟不得
進乃為文以禱凌解師濟進屯府谷募黥配廂軍二千餘人號
清邊軍令偏將王凱主之次三松嶺賊數萬圍之清邊軍驟起
斬首千餘級躡籍死者不可勝計築甯遠砦相視地脈鑿石出

泉已而城五砦遷眉州防禦使卒宋史高瓊傳

張整字成伯亳州人初為利文州都巡檢使邊夷歲鈔省地吏
不能校反遺之物整密募死士時其來掩擊幾盡有司劾生事
神宗壯之不問調荆湖將領拓溪蠻地築九城又破蠻於大田
狷狎萬眾迫黔江守兵才五百整伏其半於托口旁戒曰須吾
度金斗崖舉幟則譟而前且率其半趨之賊笑不為備幟舉伏
發前後合擊殺獲不可計哲宗召對官至威州刺史卒宋史本傳
王鑑霍邱人為淮西兵馬鈐轄李全犯揚州鑑從趙范趙葵救
之屢敗全全騎陷泥淖中遂為我軍刺死鑑以功除鎮江都統
制封廬江郡開國侯宋史趙葵李全傳 江南通志

明劉才字子才霍邱人明興歸附歷營州中護衛指揮僉事降
燕從戰有功封廣恩伯才不為苟合亦不輕訾毀人甚為仁宗

所重

明史陳亨傳

程寬穎上人以功官都指揮同知從張輔平交趾進都督僉事

卒追封保昌伯諡忠威

明史功臣表

曹隆穎上人從燕起兵以功官都督同知永樂九年卒宣德初

追封安陽伯諡忠毅

明史功臣表

鹿鸚穎州人兄弟五人鳳鸞鸚鵡鵬皆勇敢善射而鸚更矯健

正德七年劉六等破太和圍穎上鸚兄弟應募守城生擒賊將

李龍號萬人敵者又擒其劇賊李魁賊遂解去都御史彭澤上

其事授錦衣百戶而鸚已卒土人立廟祀之

江南通志

李栩字蘧蘧穎州人初名麟孫貢成均後改焉崇禎八年流賊

陷穎踰月栩從山東歸散財結士得三百人九月賊又至栩敗

之茨河鋪又設計擒其巨魁白虎神闖場天因甲冑見制府朱

大典請曰賊焚我先人樞誓不與俱生願得當一面殺賊大典

令栩以都司領義勇十年八月賊突至栩單騎出呼曰識李栩

否賊不敢偪栩率士夜出斫營賊渡河走追斬無算捷聞加參

將無何賊首袁時中已就撫復思叛設筵邀栩至其營數軍實

栩不疑而往酒半酣於席間害之

穎州府志

國朝楊履道字中長亳州人順治二年劄委蘇州守備隨征江南

以從剿海寇功補撫標右營中軍調征湖南廣西雲貴積功歷

直隸懷來參將升福建延平府副將剿山寇以勞成疾卒於官

子光斗庚戌武進士隨征閩以功加左都督銜任衡州衛守備

再任金山衛守備卒於官

穎州府志亳州志

劉忠亳州人順治戊子武舉署六安守備剿六安霍邱土寇張

復還等有功升鄆城守備剿平榆寇又隨使西域後以親老歸

養亳州志以上舊志

趙光璧字聘珍阜陽武舉直隸懷來都司嘉慶閒滑縣之亂防開州有功歷廣西參將擊破教匪於芳林渡累擢兗州營總兵防日照海口道光中卒阜陽縣志新修

重修安徽通志二百三十三

人物志

武功四

滁州

隋張齋字文懿南譙州人父雙自清河太守免歸周時鄉人郭子冀密引陳寇雙欲擊之猶豫未決齋贊成其謀竟破賊由是以勇決知名賀若弼鎮江都特敕齋從平陳之役與有力焉封文安縣子率水軍破賊竿子游於京口薛子建於和州徵拜大將軍文帝命升御座謂曰卿可為朕兒朕為卿父尋從楊素征江表破高智慧於會稽吳世華於臨海進位上大將軍卒於潭州總管諡曰莊北史本傳

唐張訓滁州清流人楊行密據合肥訓往見授親兵遷黃頭都

虞候擊舒州盜吳迥知名揚州之役訓潛入城滅餘火得穀數十萬斛以賑饑民明年擊殺甘露鎮使陳可言遂取常州授常州刺史乾甯初駐軍漣水汴將龐師古屯兵清河口訓率舟師與戰斬師古海州戍將陳漢賓請降將兵直趨其城漢賓倉皇解甲聽命天復初昭宗遣李儼封行密吳王訓以功擢司徒卒贈太傅清河郡公十國春秋本傳

明趙奎字思義全椒人從太祖渡江有功授總管守宜興洪武五年從征甘肅力戰有功與同縣王才俱官都指揮使才亦以材武著江南通志

何文輝字德明滁人全椒縣志云全椒人太祖下滁州得文輝年十四撫為己子賜姓朱氏以天甯翼元帥守甯國進江西行省參政擊斬新淦鄧仲廉援安福走饒鼎臣取淮東下平江進行省左丞

復其姓以征南副將軍與胡美取福建降其同僉達里麻總管翟也先不花入城秋毫無犯州縣聞風皆降又從取陝西征蜀授大都督府都督僉事世襲從北征巡居庸以疾召還卒子環成都護衛指揮使征迤北陣歿明史本傳

平安滁人全椒縣志云全椒人父定從太祖起兵官濟甯衛指揮僉事從下元都戰歿安初為太祖養子襲職建文時伐燕從李景隆為先鋒燕王將渡白溝河安伏萬騎邀之戰至暝互有殺傷明日復戰安擊敗房寬陳亨王幾為安架所及李景隆敗燕兵圍濟南安渡河攻德州圍乃解又戰單家橋擒薛祿戰楊村敗李彬戰淝河斬王真進至小河又斬陳文燕軍大懼會糧運為燕所阻謀移軍就糧遂為燕所乘安被執永樂初為北平都指揮使

七年覽奏見安名曰平安尙在耶安聞之自殺明史本傳

重刊後進志 卷三十三
陳旭全椒人父彬指揮僉事旭嗣官爲會城衛指揮同知舉城
降燕王入京師封雲陽伯永樂四年從張輔征交趾爲右參將
破西都師還陳季擴叛復從輔往剿輔還又命副沐晟八年以
疾卒於軍

明史本傳

方瑛全椒人都督政之子政戰死麓川瑛發憤報讐以都指揮
同知隨王夔征麓川直突賊壘擊斬無算遂平其地進都指揮
使討貴州羣苗擊賊香爐山大破之又平四川草塘苗黃龍韋
保封南和伯湖廣苗叛拜瑛平苗將軍討之所過秋毫無犯賊
渠蒙能中火鎗死遂進沅州連破鬼板天堂等數百砦留鎮貴
州進爵侯瑛前後克砦幾二千俘斬四萬餘平苗之功無與比
者尋卒於鎮諡忠襄

明史本傳

陳友全椒人其先自西域徙正統九年充甯夏游擊與黃真擊

兀良哈多獲進都督僉事景泰二年與方瑛等擊賊香爐山大
破之畱鎮湖廣天順元年隨瑛征天堂諸苗大獲命充左副總
兵又與瑛討平蒙能餘黨封武平伯孛來犯邊連戰敗之召還
進侯卒後贈沔國公諡武僖

明史方瑛傳

劉昭全椒人永樂五年以都指揮同知使朵甘烏思藏建驛站
還至靈藏番賊邀劫昭敗之進都指揮使鎮河州宣德二年討
平松潘進都督同知劄兒加邀殺中官使西域者奪璽書金幣
去命副劉廣討之劄兒加請還所掠貢馬贖罪帝以窮寇不足
深治命昭等還

明史昭傳

王撫全椒人父得從太傅徐達北征以歿撫世襲副千戶二十
八年調廣西從都督楊文征奉議南丹等處以勞績遷南甯衛
武緣守禦千戶所又從討平青水蠻及慶遠賊永樂四年征安

重刊安徽通志 卷二十三
南馬平忻城等處奮勇率為諸將先戰功懋焉卒子璫襲廣西通志

增新

周玉字廷璧滁州人都督同知賢之子也以父死事超二官為萬全都司都指揮同知舉將才玉為首率所部援延綏從王越擊紅鹽池還守宣府寇入馬營赤城擊敗之小王子犯大同敗總兵官許甯寇宣府玉擊敗之白腰山未幾復入玉又敗之移

鎮甘肅病歸卒諡武僖明史周賢傳

吳亮來安人英宗初討新淦賊有功累進都督僉事副蕭授鎮湖廣貴州破普定蠻阿遲斬貴州計沙苗總牌等進右都督正統十一年卒亮姿貌魁梧性寬簡不喜殺僇所至蠻人懷附明史

蕭授傳

彭程全椒人祖勝從太祖征伐有功封明威將軍程襲指揮僉

事正統中寇鄧茂七據延平程往征之已下營忽移他處其夜賊來劫見空營驚退翌日師問故程曰下營時有怪風占而知之眾其欽為神明遂大敗賊擊斬招撫無算景泰初葉中畱叛程復大破之擒賊首五人升指揮同知浙江通志全椒縣志

錢輅字廷用全椒人景泰中海寇嚴啟盛恃險為亂輅率舟師追七日夜至黑水洋大小十一戰賊敗還復征沙尤寇斬酋蕭政通以功升泉州衛指揮同知福建通志

歐磐滁州人成化中擢廣東都指揮僉事屢剿蠻寇有功以薦充廣西右參將討融縣八峒獠克之又偕按察使陶魯攻破鬱林陸川賊黃公定胡公明等進都指揮使同知府江永安諸獠亂磐自象州修仁直搗陸峒所向摧破遷廣西副總兵毀思恩土官岑濬所築石城濬來拒擊敗之進都督僉事鎮湖廣磐為

將廉能得士久鎮南邦蠻人畏服

明史本傳

康友惠字濟民全椒人正德中為郟城尉薊賊劉六等攻城守將孫達遜惠激厲義勇選士伏城外劫之斬獲數十策賊必復來乃增城浚河為堅守計賊果大至礮擊之一發斃其渠名白者賊大駭以火車攻城惠潛燔之遂乘勝追擊賊凡七至不克乃遠遜功竟以位卑不錄卒於官百姓立祠肖像祀之

全椒縣志

丁桐全椒人福建興化衛僉事晟之孫嘉靖間襲任善射習海事每駕颿自持舵截海能於檣側馳突呼嘯先後歷小埕南日浯嶼寨把總屢有捕誅島夷功已而以海禁太嚴中蜚語下獄諸寨水軍扼腕流涕願為桐死久之刑部郎中陸穩以卹刑至力為疏理會倭侵軼江浙給事曹禾薦桐材勇詔釋之而桐已孤憤久結出獄遂絕

福建通志新増

孫克振字養獅滁州人萬曆癸卯舉人歷知東鄉湯溪二縣有聲明季流寇犯滁州克振與同鄉陳國計等協力守禦危城得

全國計亦由明經仕至平樂令

江南通志

金九陞字允納全椒人萬曆乙卯舉人崇禎中知棗陽縣流寇躡郎襄九陞練民兵儲糧以待獻賊入境潛兵擊之殺其渠混天一字王擢南光祿寺署正歷戶部郎中寇犯廬鳳兵部尚書范景文委督浦口倉儲寇不敢徧累遷榔桂兵備討平徭賊馮異諸峒聞風乞降且請入峒撫納左右勸勿行九陞毅然許之比至婉言慰諭諸酋相率羅拜受約束而還弟九殿號盤石究心韜略討論輿地形勢著要說山東賊起九殿條上方略兵民戢然以子光辰累封大理寺正卿

一統志湖北廣西名宦江南舊通志

國朝晉國璧全椒人順治初以貢任袁州推官土賊起城守有功

周球字季珍來安人順治乙未武進士授廣州左衛守備升南
贛遊擊癸丑冬吳逆倡亂江楚震動球日訓練以備不虞甲寅
三月閩寇曾若干以萬眾截贛下河巫把什以千眾屯贛大柏
球連擊大敗之六月偽將軍賈振魯自黃竹入寇陷石城圍甯
都球進師黃坊戰自辰至申賊始散走疾馳追擊連破賊營十
二甯都圍解十二月偽總兵謝海叔圍會昌球援之抵珠蘭擒
其將林九苞乙卯降人陳昇郭應輔據龍泉叛球奉檄追剿獲
陳昇斬之又擒偽總兵凌子亮陳飛雲丙辰二月賊偽將軍韓
大任以閒諜來誘縛之以獻升贛州協鎮十月敗賊黃土標王
割耳於天一宮斬千餘級實授參將閩疆甫定偽總兵邱萬寶
等復踞龍泉球方病足毅然請行戰於五里排斬三千餘級安

江南通志

插難民萬二千家丁已論功加署都督僉事三月擊賊於黃塘
駐師大烏港口絕其歸路賊奔零都又追至姜阮口斬千三百
級戊午戰於老虎洞眾軍合擊斬六千餘級韓大任降復統師
援湖南永興告急即往趨之斬九百餘級殲偽總兵二員明日
賊復乘象渡濠球斂兵入城以火罐驚象象返奔賊填濠死者
無算敘功加左都督鎮守山西太原旋以漢羌總兵鎮撫四川
壬戌

上念畿輔重地移鎮眞順廣大保定等處卒於官

贈太子太保

賜祭葬

江南通志
滁州志

孫可宗全椒人康熙癸酉武舉第一明年成進士授襄陽守備
從征紅苗戰比有功升陝西興安都司

全椒縣志

重刊安微通志 卷三十三
楊廷幹全椒人以武舉歷官狼山遊擊主倫肆逆守禦黃河獲
遺醜升廣東澄海鎮副將訓士捕盜洋面肅清升福山營總兵
全椒縣志
以上舊志

和州

梁昌義之歷陽烏江人少有武幹齊曹武為雍州以義之補防
閤及武代還梁高祖為雍州刺史義之遂畱事焉義師起版為
輔國將軍軍主每戰必捷建康平封永豐縣侯出為盱眙太守
累遷北徐州刺史鎮鍾離魏中山王元英率元道明楊大眼等
眾數十萬來寇鍾離鍾離北阻淮水魏人以邵陽州西岸作浮
橋跨淮通道以攻城城中兵纔三千義之隨方抗禦每彎弓所
向無不應弦高祖遣曹景宗韋叡來救大破魏義之追至洛口
而還以功進號軍師將軍義之性寬厚為將能撫御得人死力

及居藩任吏民安之改封營道縣侯及卒高祖深慟惜之諡曰

烈子寶業嗣

梁書
本傳

唐勒思齊歷陽人生有神力武后召見奇之授游擊將軍李白
勒將軍歌云太古歷陽郡化為洪川在江山猶鬱盤龍虎祕光

彩特生勒將軍神力百夫倍

李太白集
江南通志

明華高和州人以巢湖水師來歸積功遷秦淮翼元帥與鄧愈
徇廣德守將嚴兵城下高以數騎挑戰衝擊大破之遂取其城
得兵萬人糧數千斛從平常州破趙普勝敗陳友諒克武昌授
湖廣行省左丞進行省平章政事封廣德侯繕廣東邊海城堡
高請行事竣至瓊州卒以無子納誥券墓中贈巢國公諡武莊

明史
本傳

仇成舍山人以功遷秦淮翼副元帥太祖攻安慶敵固守不戰

廖永忠張志雄破其水寨成以陸兵乘之遂克安慶以成爲橫海指揮同知守其地時左君弼據廬州羅友賢以池州叛四面皆賊境成撫聚軍民守禦嚴密漢兵不敢東下從征鄱陽殲敵涇江口功最洪武三年僉大都督府事鎮遼東十二年封安慶侯二十年充征南副元帥討平容美諸峒復從大軍征雲南功多卒贈皖國公諡莊襄子正襲

明史本傳

王銘字子敬和州人隸俞通海麾下與吳軍戰太湖矢中右臂引佩刀出其鏃復戰龍灣之役逐北至采石銘獨衝敵陣敵兵攢槩刺銘傷頰銘三出三入所殺無算前後數十戰功多命守松江移太倉捕斬倭寇千餘累官至長淮衛指揮僉事移鎮溫州上疏請繕城濬濠悉倍於舊加築外垣起海神山屬郭公山首尾二千餘丈宏敞壯麗屹然東浙巨鎮帝甚嘉之歷右軍都

督僉事後坐藍黨死

明史本傳

楊文舍山人父興戰死鄱陽文襲屢有功洪武二十八年八月以都督爲鎮南將軍討龍州土官趙宗壽宗壽伏罪來朝令移兵討奉議南丹叛蠻十一月奉議南丹悉平三十年以左都督屯田遼東古州蠻林寬叛以齊讓爲平羌將軍討之讓逗遛未進九月以文爲征虜將軍代齊讓城銅鼓衛未幾讓禽林寬械入京誅之三十一復平其餘黨乃詔班師

明史太祖紀廣西土司傳

通志

徐義和州人從太祖渡江每臨陣輒躍馬揮刀作虎吼衝突眾皆披靡以前後功累擢建甯右衛指揮僉事又州人胡淵沈興亦皆以材勇從太祖有功官指揮

通志

京師遷右軍都督僉事

通志

武功

和州

張亨含山人元末與從父驥率邑人保障鄉里同來歸從圍平江驥戰死閭門亨以功授虎賁衛管軍千戶從取太原征巴蜀皆有功遷興化衛親軍指揮使

和州志

徐信字彥實和州人襲父職為建甯右衛指揮僉事永樂間以擒尤溪寇擢福建行都司指揮僉事正統十三年鄧茂七亂偏城為營信偵其虛實分兵三路進破其營斬獲殆盡

福建通志

李濬和州人父旺為燕山左護衛副千戶濬嗣官從燕起兵入京師累遷都指揮使封襄城伯永樂元年出鎮江西永新盜起捕誅其魁召還卒子隆字彥平嗣封雄偉有將略數從北征出奇料敵帝器之既遷都以南京根本地命隆留守仁宗即位命鎮山海關復守南京清慎守法尤敬禮士大夫及召還南都士民流涕送之卒子珍嗣歿於土木贈侯諡悼僖無子弟瑾嗣成

化三年四川都掌蠻叛命佩征夷將軍印充總兵官往討盡破諸蠻寨斬首四千五百有奇分都掌地設官控制之師還進侯累加太保卒贈芮國公諡壯武子黼嗣伯

明史本傳

童養鏡含山人隆慶間以福建泉州衛指揮使任中路南日寨把總初養鏡與父乾震捕斬福清倭有軍中二童倭賊且空之謠及是以擊沈海賊功令其子與藩升襲都指揮同知

福建通志新

呼良朋和州人世襲鎮東衛千戶戚繼光奇之令督僉事築鎮東城至今賴之後徙廣西大帥佩征蠻將軍印

福建通志

張嶺字九仞含山人以薦授錦衣衛把總生擒賊首帖天飛擢禁衛守備崇禎八年流賊至和嶺設守禦邑人賴之

和州志

遷守備攝福建福清營遊擊康熙十九年從征臺灣大破逆賊
林升等進廈門取金門掃平逆穴特授左都督補廣東右翼鎮
遊擊遷永固城副將

江南通志
以上舊志

廣德州

吳朱治字君理丹陽故鄣人初為縣吏後察孝廉州辟從事隨
孫堅征伐中平五年拜司馬從討長沙零桂三郡賊周朝蘇馬
等有功堅表治行都尉從破董卓於陽人入洛陽表行督軍校
尉特將步騎東助徐州牧陶謙討黃巾會堅卒治翼策就袁術
知術德政不立乃勸策還平江東太傅馬日磾在壽春以治為
吳郡都尉治到吳吳郡太守許貢拒之於由拳治大破之貢走
治遂入郡領太守事策卒治與張昭等共立權權表治為九真
太守行扶義將軍後封毗陵侯以年老思戀鄉土自表屯故鄣

諸父老故人莫不詣門治皆引進與其飲宴鄉黨以為榮

三國志本傳

按續漢書郡國志中平年分故鄣縣南置吉安而無廣德縣
是故鄣即廣德也胡三省通鑑注亦云今廣德軍是故鄣縣
之地朱治於中平五年前已隨孫堅征伐則是時并未有吉
安入之廣德可以無疑但吳志附朱然朱績於治後然本施
氏治姊之子志既未明言為何地人故闕之以示慎

明孫昇字伯高建平人永樂甲申進士除臨清令發廩賑饑以
最擢山東道御史值蒲臺縣妖婦唐賽兒作亂青州衛指揮高
鳳不能制攻莒州圍安邱昇統張楡馬撫王真等敗賊於諸城

山東悉平擢遼府長史調知建昌府三年致仕歸

南畿志

蔡汝蘭字子芳廣德人胡宗憲視師海上聘掌書記授都閫以

征倭功歷南贛參將宋大斌者州人隸汝蘭麾下以功官遊擊

廣德州志

征倭復朝鮮皆有功進遼東參將未之官卒
國朝章良臣字鼎賢廣德人康熙初應募入閩為武弁金某子遂

廣德州志

冒其姓從平耿逆及澎湖臺灣諸寇叙功加等授左都督引疾
歸里軍民立石頌之

李國盛字公宇建平人康熙十四年從征福建為把總調衢州
千總明年又調金華破賊馬公輔由江山進仙霞嶺連克三關
進師延平次小門山枕楓嶺大破賊焚其寨十八年攻漳州守
鳳山十九年攻獅子山觀音山等處連破十九寨克海澄取厦
門授都司敘功加等授左都督以疾致仕子庭芝世襲拖沙喇
哈番官至青州營守備乾隆二年蒙

恩世襲雲騎尉 廣德州志 以上舊志

六安州

漢英布六安人年少時客相之當刑而王及坐法黥布欣然笑
以論輸驪山亡之江中為盜項梁定會稽布以兵屬西擊景駒
秦嘉等布常冠軍及籍殺宋義使布先涉河擊秦數有利入關
封九江王都六田榮叛楚項籍徵兵九江布稱疾不往漢敗楚
彭城布又稱疾不佐楚項籍怨之數誚讓布布愈恐漢乃使隨
何說布布遂歸漢以兵會垓下亡楚剖符為淮南王都六漢既
殺韓信彭越布與二人同功一體發兵反漢擊之布走長沙袁
王使人誘布 師古曰惠帝二年袁王同 至番陽殺之 漢書本傳
明朱亮祖六安人仕元為義兵元帥太祖克甯國禽之既而叛
去據宣城常遇春與之戰受傷而還諸將莫敢前太祖親往督
戰縛以見謂之曰爾將何如對曰生則盡力死則死耳壯而釋

之以功授樞密院判破李伯昇攻陳友定功多遷浙江行省參政帥師討方國瑛降之洪武元年副廖永忠取廣東悉定其地進平廣西班師三年封永嘉侯四年伐蜀徇下未附州縣十二年出鎮廣東亮祖不學多不法明年召還與其子暹同鞭死御製墳誌仍以侯禮葬

明史本傳

葉旺六安人與合肥馬雲同隸長鎗軍謝再興爲千戶再興叛二人自拔歸以功並授指揮僉事洪武四年偕雲鎮遼東元太尉納哈出以兵至見備禦嚴不敢攻由蓋州城南十里沿柞河道引歸旺先以兵扼柞河緣河壘冰爲牆沃以水凝沍如城旁設阮奔伏兵以俟寇至伏起納哈出倉皇趨連雲島遇冰城旁走悉陷於奔遂大潰僅以身免第功旺與雲俱進都督僉事十二年命雲征大甯旺畱鎮十九年召旺爲後軍都督府僉事居

三月遼東有警復命還鎮二十一年卒旺鎮遼凡十七年與雲

同功而旺尤久遼人德之嘉靖初命遼同立祠以祀

明史本傳

聶英六安人父輝元末元帥屯州西軒皇嶺保障鄉里來歸除六安千戶所百戶輝卒英襲從藍玉征雲南克普定盤江所向

有功改六安衛左所

六安州志

張義六安人父賢明初以苗軍千戶歸附累升福建指揮僉事陣亡義洪武二十五年繇觀海衛調福甯衛五傳至壁嘉靖二十三年任烽火寨把總倭犯大金等處俘馘有功三十八年倭數萬寇巖前眾欲昇之避壁曰吾世受國恩有死爾遂戰死事聞孫邦奇襲部錄壁功升指揮使邦奇子萬紀萬歷間任銅山把總溫州守備惠潮參將廣西總兵爲人洞精簡易食糲衣麤結束如士卒寇盜至鷺舉颺發時時與士卒雜戰得海上盜收

用之因以攻他盜其把總銅山時年二十餘爾又初釋諸生業而驍健聞海上有盜魁大言曰吾白頭天吳之宮甯復有張孺子者乘巨艘詐爲大帥徑入其界地萬紀從數人拏舟往逐之舟漸近鼓聲旗色不相應萬紀跳盜艘手殺其三人盜魁出反跳萬紀舟萬紀從人與格鬪立擒之萬紀每陰雨度賊且出輒駕小艇如漁父腰弓劍隨驍勇數輩遇賊至輒登舟擊殺之雖窘阻神意彌王所居海上盜悉遠徙估客商舶如行內港在惠潮時尤著四十一年有征黎之役萬紀以總兵先登深入兵無後繼發憤自焚死了弱家貧老母尚在事聞賜襲福建通志新增張文六安人初依戴雲從其姓名文政雲爲元安豐路樞密院同知守禦六安固鎮率所部來歸授雲官後爲江西省理問選文政充舍人從征浙西中原並有功洪武三年復姓單名文除

濟南管軍百戶嗣後無役不從並著勞績升浙江都指揮僉事

子豫亦以功官陝西行都司都指揮僉事六安州志

張澡字子新六安人參政諧之子也澡少襲祖爵爲六安衛指揮使隆慶四年駐福山防倭有功歷至參將前後任浙江十年大小數十戰皆捷萬曆九年爲吳淞總兵上水操陸操沿海諸圖當軸稱善移鎮雲南築三大營一曰威遠二曰壩革三曰九江並築子城相應援苗無敢犯朝廷嘉其功移鎮廣西以南京都督僉事致仕著有正續百將傳節評孫子繹語左氏附餘筭書行世江南通志六安州志

國朝黃鼎字玉耳六安諸生崇禎閒流寇猖獗巡鹽張倫序薦鼎異才令往光固糾合義勇爲進取計闖賊據南陽鼎擒殺其所大委署州縣授黃州通判歷至總兵督理剿寇事宜駐光固

重刊安徵通志 卷三十三
大兵南下鼎歸誠以總兵駐防皖江賊李時嘉焚掠太湖鼎討平之
之又平定池陽水賊歸還流散難民婦女數千人為同列所忌
罷歸總督馬國柱題留軍前參決機務剿定麻埠賊張福寔鼎
功居多 江南通志

黃九疇字倫敘總兵鼎之姪也鼎軍務悉屬之為總督馬國柱
所知江西亂授南康營參將進剿所至款伏江西巡撫蔡士英
尤重之題留轄下尋改廣西柳州營三藩煽亂九疇自拔先還
大將軍圖海稱其才奏改文職授僉事道隨征雲南滇平應就
職慨然曰屢經多難得守邱隴足矣引疾歸 六安州志
羅一楨字貞甫霍山貢生順治初山賊侯應龍張福寔盤踞麻
埠屢犯霍城一楨偕知縣團練鄉勇分列入營城西尤當賊衝
一楨身自堵禦相機戰守頻挫賊鋒城得不陷 霍山縣志

黃九錫字公位六安人順治乙未武進士性至孝父鏞明末守
備昌平歿於王事九錫聞關數千里冒刃入賊營負其骸歸季
父鼎進剿山賊用為參謀平定鷹巢蓮花等寨而不居其功居
家惟讀書教子力行善事嘗獨力建尊經閣疾革遺命諸子成
之 六安州志

史世科字祥字原籍遼東明季徙六順治中歷官蘇松鎮標守
備駐防崇明屢卻海寇又從提督梁化鳳立功升都司世襲撫
沙喇哈番子斌字兩勳以蔭守禦廣東新會遷衢州守備龍門
都司 六安州志

江縉字奕鴻六安人康熙戊辰武進士為鎮江守備改河南適
汝州民變大帥令率百騎往傳諭解散宜陽變又令往時太守
某在城眾欲得而甘心縉為設方略堅守四十日眾始解去兵

部侍郎張廷樞往按悉其事深器重之擢天津都司告歸著有武經備旨讀史百詠諸書

六安州志

鮑友仁字輔純六安人以武舉官江西廣信營守備勤於訓練升武甯都司適楚省教匪滋事籌解火藥記功進汀州遊擊嘗三鼓追捕巨盜至數十里及之發二矢殺二人生擒數十人以歸汀州自此無盜升參將查理洋匪朱渥等投誠事宜奉

旨加一級升督標副將以足疾歸

六安州志以上舊志

鮑友智字臨川六安人一甲二名武進士嘉慶二十年官江甯城守協副將擒教匪方榮升等加總兵銜擢湖南永州總兵前後十八年三署提督馭將士簡軍實號令嚴明賞罰必信道光十年剿辦猺匪輕進鏘級事平復原官嘗與羅思舉論兵謂宜將識兵心兵知將意子翰雄由武舉官廣西守備從友智辦猺

有功卒於軍

六安州志以下新修

鮑起豹字愛山六安人父友信官昭通守備征苗死事起豹襲世職道光中歷瓊州鎮總兵剿撫生黎擒斬海盜九龍發石十六等百七十餘人又獲文昌縣聚眾匪首焚其名冊咸豐初累擢湖南提督剿粵逆於永州破斃偽王蕭朝貴馳援武昌省城堅守八十餘日出奇兵擊賊圍乃解四年賊犯岳州湘潭奉

命駐長沙調兵分援俄解職卒

六安州志

戴春林六安人咸豐間辦團立功同治初從潘鼎新攻江浙踞逆累保

記名提督復在河南山東直隸等省統帶馬步協剿捻逆疊受重傷調赴李鴻章西征行營同治九年傷發在營病故奏請從優

予卹祀本省昭忠祠又都司王福奎沈勇權俱六安人立功病故一併

議卹奏案

泗州

漢陳嬰故東陽令史居縣中素信謹稱為長者東陽少年殺其令相聚數千人欲置長無適用乃請陳嬰為長縣中從者二萬人欲立嬰為王異軍蒼頭特起陳嬰母謂嬰曰自我為汝家婦未嘗聞汝先古之有貴者今暴得大名不祥不如有所屬事成猶得封侯事敗易以亡非世所指名也嬰乃以兵屬項梁為楚柱國項羽死屬漢高祖六年封堂邑侯史記功臣侯年表

唐劉行舉盱眙人武后時徐敬業起兵揚州行舉與楚州刺史

李從福連和嬰城不從敬業平拜遊擊將軍萬姓統譜

按唐書李勣傳敬業起兵楚州司馬李崇福率所部三縣應

之今統譜通志所載全與史異第刺史司馬官既不同崇福

從福名亦小異姑仍舊志錄之

宋劉綱招信縣人父位死王事綱襲其職仍保聚橫山今山上

江南通志

有墩人呼摩旗墩相傳為綱建旗之處移鎮淮揚遷洪州總管

明李文忠字思本盱眙人太祖姊子也年十二而母死踰二年

父貞攜之謁太祖於滁陽太祖喜甚撫以為子使從己姓年十

九以舍人將親軍所向有功授帳前左副都指揮使守嚴州連

破苗帥楊完者完者死降其眾張士誠來寇復連破之進同僉

行樞密院事拜浙東行省左丞總制嚴衢信處諸全軍事士誠

屢寇諸全並擊卻之別築一城以相犄角士誠復以二十萬眾

來攻新城文忠馳救之眾告賊勢盛宜少駐文忠仰天誓曰國

家之事在此一舉乃分軍為左右而自當敵衝會處州援軍亦

至文忠引鐵騎數十乘高馳下賊圍之數重文忠縱騎馳突賊皆披靡大軍乘之城中亦鼓譟出敵遂大潰吳平加浙江行省平章事復姓李氏洪武二年從常遇春出塞薄上都走元帝遇春卒代將其軍明年與大將軍分道北征時元帝已崩太子愛猷識里達臘新立文忠諜知之兼程趨應昌元嗣君北走獲其敵子買的立八刺暨后妃諸王將相數百人及宋元玉璽玉冊等降其眾數萬獻捷京師帝御奉天門受朝賀大封功臣文忠功最授右柱國大都督府左都督封曹國公家故多客嘗以客言勸帝少誅戮又諫征日本及言宦者過盛非不近刑人之義以是忤旨十六年遂得疾明年卒追封岐陽王諡武靖配享太廟肖像功臣廟位皆第三父貞前卒贈隴西王諡恭獻三子景隆增枝芳英皆帝賜名景隆小字九江以大將軍伐燕喪師百

萬召還及燕師至開金川門出降墮其家聲

明史本傳

鄧愈虹縣人初名友德太祖賜名愈父順興據臨濠與元戰死兄友隆復死眾推愈領軍事年十六每戰先登眾服其勇自盱眙來歸授管軍總管從渡江有功守廣德州破長鎗帥謝國璽於城下克徽州守之敗楊完者破余子貞說降饒守於光遂移守饒饒濱彭蠡與友諒接境數擊卻其寇兵進江南行省參軍友諒丞相胡廷瑞獻龍興路改洪都府以愈爲江西行省參政守之爲賊所破旣而復得仍命守之友諒眾六十萬人來寇樓船高與城等城壞三十餘丈愈且築且戰不解甲者三月太祖自將來援圍始解論功與克敵等武昌平領兵徇未附州縣進江西行省右丞吳元年建御史臺召爲右御史大夫領臺事洪武元年經略中原率襄漢兵取南陽以北未附州郡賅元兵於

瓦店遂克南陽禽史國公等二十六人均房金商悉定三年從
大將軍出定西敗擴廓進克河州出甘肅西北數千里而還授
右柱國封衛國公同參軍國事五年以征南將軍討辰澧諸蠻
克四十八洞十年以征西將軍偕沐英討吐番川藏窮追至崑
崙山俘斬萬計留兵戍諸要乃還至壽春病卒追封甯河王諡
武順子鎮嗣改封申國公以征南副將軍平永新龍泉山寇其
妻李善長女也坐黨死明史本傳
費聚字子英五河人太祖遇之於濠偉其貌深相結定遠張家
保有民兵郭子興欲招之太祖與聚偕往既定復叛又與聚計
取之降其眾又招降豁鼻山秦把頭等從取靈璧克泗滁和州
授承信校尉既定江東克長興以聚副耿炳文守之屢擊敗張
士誠寇兵士誠喪氣吳平進指揮使從湯和討方國珍降之復

由海道取福州剿海寇葉陳二姓於蘭秀山洪武二年大軍取
西涼以聚鎮平涼三年封平涼侯明年從傅友德征雲南雲南
平進取大理蠻地悉平置貴州都指揮司以聚署司事十八年
以總兵官征廣南禽火立達還鎮雲南召還坐李善長黨死子
超征方國珍時戰死璿官江西參政孫宏征雲南有功為右衛
指揮使後以罪戍金齒明史本傳
趙彝虹縣人為燕山右衛百戶從北征擢永平衛指揮僉事降
燕歷戰皆有功成祖稱帝封忻城伯宣德初卒子榮嗣明史郭亮傳
周長天長人為燕山中護衛燕兵起有功永樂九年與尙書宋
禮侍郎金純治漕渠修復會通河置十五閘濬黃河故道以殺
水勢十五年卒追封萊陽伯諡忠毅明史功臣表
侯端盱眙人永樂中授金山衛指揮同知十六年倭寇入犯端

卷之三十三
若戰被重傷復招散卒進戰焚賊船十餘艘賊不得歸遂盡殲之

蘇名宦

韓觀字彥賓虹縣人高陽忠壯侯成子也以舍人宿衛忠謹爲

太祖所知授桂林右衛指揮洪武十九年討平柳州融縣諸蠻

遷廣西都指揮使嗣是屢平諸蠻前後斬獲萬餘級性鷙悍誅

罰無所假成祖卽位委任如初命佩征南將軍印鎮廣西知其

明史本傳

嗜殺璽書戒之九年移鎮交阯十二年卒

楊盛虹縣人成化閒任福建北路烽火寨把總部伍整肅士卒

福建通志新增

用命累擒劇賊有功

張廉天長人從燕起兵有功又隨北征累官都督僉事宣德七

明史功臣表

年卒追封榆次伯諡忠敏

秦經國五河人嘉靖中世襲鎮東衛指揮同知倭薄城下一再

殲之擢守備進參戎破張連擒林鳳剿曾一本滅劉貴大著戰

功經國諳海道自浙至粵無不知其曲折臥聽水聲能辨其地

嘗言岳武穆武臣不惜死五字勝孫武十三篇也論者謂東南

水戰無踰經國云

福建通志

國朝孫文標字俊侯盱眙人從兄毓秀明末爲九江總兵南都覆

毓秀死焉康熙十三年耿逆叛文標投筆從戎隸參將蔣茂勛

下僞總兵馬九玉越仙霞嶺犯浙文標一戰敗之進攻九龍山

賊踞山依險建策從硯山上襲其背破之賊平復從茂勛定八

閩克臺灣皆有功授陝西固原遊擊遷山西平魯參將晉廣東

三江口副將卒於官

泗州志以上舊志

三石口國保各款官賦土產志

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

國東山南對山列西固原嶺巖巖山西不魯魯嶺晉嶺

